



大唐開元占經卷第八十九

彗星卷中

彗星晝見一

彗星圖曰彗星晝見所臨國下當為河天地合矣按孫盛晉陽
秋曰愍帝大安元年夏四月彗星晝見不行占也

彗字犯日二

孝經雌雄圖曰彗在日傍子欲殺父又曰四彗在日中君有德
天下歡以大豐盛也 石氏曰彗星守日候精星也天下大亂
兵革大起羣臣並謀天子亡期不出三年 玉曆曰彗星貫日
臣殺君子弑父貫日過事必然期百日遠一年

彗星犯月三

河圖聖洽符曰彗星入月中必有破軍死將兵大起其國以火

災比三年大飢 洛書曰彗星入月中必有亡軍亡將起以北
國 海中占曰彗星入月中兵大起有臣欲入其君者十二年
大飢 海中占曰彗星入月中星無光不出其年亡國星出亡
國復立 河圖曰彗星角襲月臣弑其主 按戰國策曰唐睢謂
秦王曰專諸刺王僚彗星襲月也 甘氏曰彗星在月首必有大

兵起者將軍死有失地君期不出二年 文曜鉤曰彗星之行
掩月五星拂而過兵大起必有戰有死將臣專政逐其主王者
憂期三年 孝經雌雄圖曰彗星在月中臣當坐君 死憂
齊伯曰彗星貫月天下有大兵臣殺主若女主當之期一年遠
二年

彗字犯五星四

黃帝占曰彗星出入太白長可五六丈金火之兵大用大戰流

血天下更政期三年遠五年 石氏曰掃星出守五星侯稱皇
天下起兵諸侯並謀天子亡

彗星犯東方七宿五

角彗字犯角

甘氏曰彗字干犯西角間白者軍起不戰邦有大喪其色赤戰
芒所指必有破軍侵城期七十日或三年 按宗書天文志曰
魏甘露二年十一月彗星見角色白景元元年高貴鄉公帥左

右兵襲晉文王未交戰為成濟所害哀帝興寧元年八月有星
孛於角亢入天市三年正月皇后王氏崩二月哀帝崩三月慕
容攻洛陽沈勁等戰死 石氏曰彗星出角天下大亂更政易王

暴兵起必有戰期三年中五年遠九年 陳卓曰彗星出角天
子起兵王廷毅大貴大疾疫 韓瑒曰彗星出角后黨恣外連

禍 郝萌曰彗星出入角長可七八尺天下更政金火之兵大用

亢彗孛犯亢

黃帝占曰彗孛星干犯亢國有昏亂釋舊布新易帝王近期百八十日遠一年 甘氏曰彗第干犯亢中國不安兵起政亂期一年 巫咸曰彗星出亢天下大飢其國有兵人民多疫人相食期不出三年 按檀道鸞晉陽秋曰孝武帝寧康二年三月丙戌彗星出氏亢移及角軫翼張長十丈東北指十一 天門退忠賊攻郡然吏民咸遠將軍桓石虔破羗賊姚萇於墊江三年正月丁未八月大赦天下太元二年九月苻堅屠涼州虜刺史張天錫車騎冲發三州吏民移諸流民悉居淮南也 荊州占曰彗星出亢天子失德天下大飢有水兵疫 按宋書天文志曰魏

景元三年十一月壬寅彗星見亢色白長五丈積四十五日滅

鍾會鄧艾伐蜀克之會艾反亂 陳卓曰彗星出亢為兵喪五穀不成

氏彗孛犯氏

黃帝占曰彗孛干犯氏大臣殺其主兵大起更政近期百六十日遠期一年 陳卓曰彗孛干犯氏大赦天子失德糴大貴 甘氏曰彗第干入氏中後宮有亂暴兵不出百八十日遠期三年 黃帝占曰彗星出氏房間綺綺索索如冬木無葉從風而倚此星出為兵戎此歲星之變見不過一年 石氏曰彗星出氏天子不安有大赦中宮有亂暴兵起不出百八十日 石氏曰彗星出氏中天下大赦其滅氏大疾惡糴大貴有兵事 石氏曰彗星起氏中天子不安宮移徙必失座 按宋書天文志曰

宋少帝景初元年十月戊午有星孛于氏北尾長三四丈西北指貫攝提向大角東行日長七八丈十餘日滅明年五月徐羨之等廢帝

房彗孛犯房

甘氏曰彗第干犯房王國定兵起民飢骨肉相殘 石氏曰第從房出天子絀行為無道諸侯舉兵守國 甘氏曰彗星出房大兵起水旱不調人多飢死去其宅田一日人相食期不出二年 郝萌曰彗星出房中國大飢有兵擅興在道旁矛戟在野戰鬪不止蜚虫橫下 陳卓曰彗星出房山崩 尚書中侯曰星孛房四邦灾按春秋魯昭公十七年冬有星孛于大辰魯大夫申須曰諸侯其有火災乎明年五月宋衛陳鄭四國同日火考異郵曰彗孛貫房王室大亂 荊州占曰彗星孛於房赤帝

之後受命人主凶有亡國 郝萌曰彗星如房後百二十日火

甄曜度曰彗星守房天下有喪戴麻鋸：天子亡不出其年

春秋緯演孔圖曰彗星守房心天下有喪一日天子亡一日

大人憂 詩緯含神霧曰蒼之亡彗出房 石氏曰彗孛干犯

鈞鈐王宮大亂不出三年

心彗星孛犯心

堯圖變書曰大辰有孛主謀見煞必有立王相射伐 春秋緯

曰星第于大辰國分為二大夫制君 春秋緯潛潭巴曰有星

第于大辰受命之君大振兵旅爭于野 春秋緯演孔圖曰彗

星賊起入大辰天帝謀易主 春秋感精符曰孛星賊起光入

大辰者將有陰謀以邪犯正與天子爭勢居位者大臣謀主兩

王並立周分之野也 易緯曰彗星守大辰東方之疫天子亡

春秋緯曰彗星守大辰天子哭按宋書天文志曰魏青龍四年十月甲申有彗星于大辰長三尺景初元年皇后毛氏崩黃

帝占曰彗星出心兵起宮中劔戟交鋒大臣相疑有戮死者近七日中七十日遠八十日春秋運斗樞曰彗守心主位分

大臣謀上天子凶玄冥曰彗星出心若守之天子有喪德令不行蝗虫大起民大飢流亡去其鄉期一年遠二年司馬彪天文志曰孝桓延熹四年五月辛酉客去營室稍順行生芒長五尺所至心一轉為彗為大喪後年鄧后以憂死也宋書天文志

曰安帝義熙十一年五月甲申彗星出天市掃帝位在房心北房心宋之分野占曰得彗柄者興除舊布新宋興之象也玄

冥曰彗星出心若守之大水五穀不成石氏曰彗守犯守心

宮鐘大鳴劔戟交橫大臣相疑天下起兵心變期急近期七日

中期七十日遠百八十日

尾彗守犯尾

合誠圖曰掃出尾箕間狀如蓬百掃臣專權陳卓曰彗星出

尾宿兵革罷弊天下大飢君子賣衣小人賣妻歲多大風大雨海中占曰彗星出入尾后相貴臣誅兵起宮門宮人走出國

易政期一年中二年遠三年按洪範天文志曰星辰變占曰漢文后七年九月星守于西方其本直尾箕末指虛危長文餘及

天漢十六日不見後三年吳楚七國同時皆反也石氏曰彗星

守于守尾后有以珠玉簪珥惑天子者譖讒大起后相貴臣誅宮人出走兵起宮門多土功近期百八十日遠一年

箕彗守犯箕石氏曰彗星出箕夷狄為亂大兵起天下大旱糴貴十倍人多

飢死死者大半期二年 海中占曰彗星出箕天下大飢大臣有見棄捐者 河圖聖洽符曰彗星出入箕天下大旱穀貴人民飢死十有五死 聖洽符曰彗星守箕東夷下濕與水君將為亂

彗字犯北方七宿六

斗彗字犯南斗

甘氏曰彗字干犯南斗度其國必亂兵大起期一年 陳卓曰彗第長干犯南斗王者病疾臣謀其君子謀其父弟謀其兄是謂無理諸侯不通天下易政大亂兵起期百八十日遠不出一年 按宋書天文志曰晉武帝太康八年九月星字干南斗長數十丈十餘日滅太康末武帝耽宴遊多疾病是月乙酉帝崩永平元年賈后誅楊駿及其黨與皆夷三族楊太后亦見殺是年

又誅汝南王亮太保衛瓘楚王偉王室兵喪之應也

春秋緯曰

彗星出南斗天下有勢皆謀 孝經雌雄圖曰彗星出南斗中宮中失火燒寶 甘氏曰彗星出南斗大臣謀反兵水並起天下亂將軍有戰若流血星若滅斗其國主亡若星明反臣受殃 近三年中五年遠七年 荆州占曰彗星出南斗天下皆謀上石氏曰彗星第於斗房赤帝之後受命人主凶有亡國

牛彗字犯牛

甘氏曰彗第干犯牽牛吳越兵自立三年而滅 陳卓云期一年遠三年彗要占曰彗第干犯牽牛中國起兵 荆州占曰彗入天鼓有兵 荆州占曰彗星干牽牛須女之間狀如彗其本有四星壘然此星出為兵此辰星變見不過一年兵大起國飢海中占曰彗星出牽牛四夷兵起邊境為亂來侵中國人主有

憂期一年中二年遠三年司馬彪天文志曰孝章建初元年八月庚寅彗星出天市長二尺所稍入牽牛三度積四十日稍滅彗出天市為外軍牽牛為吳越是時蠻夷陳縱等及安夷長宋延為西羌所殺校尉馬防行車騎將軍征西羌又阜陵王延子男觚謀反大逆天道得不誅廢為侯陳卓曰彗星犯牽牛改元易號之象也按班固天文志曰哀帝建平二年彗出牽牛七十餘日傳曰彗所以掃舊布新也牽牛日月五星所從起歷數之元三正之始彗而出之政更之象也而出入者其事人也其六月甲子夏賀良等建言當改元易號增漏刻詔書改建平二年為太初元德元年號曰陳聖劉太平皇帝漏刻以百二十為度八月已悉復蠲除之賀良及黨與皆伏誅流放其後卒有王莽篡國之禍宋書天文志曰晉惠帝永康元年十二月彗出牽

^牛之西指天市明年趙王篡位改元尋為大兵所滅也又曰多兵糴貴牛大死春秋聖洽符曰彗星出牽牛北夷驕奢治將為亂

須女彗字犯須女

石氏曰彗第干犯須女隣國有以奇女來侍者石氏曰彗字干犯須女其邦兵起女為亂若妾遷為后王者無信大亂期不出三年退女所親天下安寧矣感精符曰彗星出須女其國大兵起女主為亂王者惡之將軍戮死若以戰亡期不出三年按檀道鸞晉陽秋曰孝武寧康二年正月丁巳有星孛于女虛芒長四尺西南指太元二年五月秦符堅遣偽帥毛當符寇逼西涼州虜刺史西平公張天錫送于堅所冬十月車騎桓冲遣諮議叅軍淮南太守劉波沉舟淮泗乘虛毀計以投涼州又發

三州官吏移法流民志置淮南也巫咸曰彗星出須女之間辰星之變也 陳卓曰彗星出須女帝以女亡有水災糴大貴益貴

虛彗星孛犯虛

郁萌曰彗星干犯虛中有哭泣之事墻垣無立者有井田之法改制之事 荊州占曰彗星干犯虛宗廟起兵 陳卓曰彗星孛干犯虛其國野戰流血星芒角所指兵所積也 甘氏曰彗星孛干虛其國亡 帝覽嬉曰彗星出虛兵大起天子自將兵於野大戰流血其芒炎所指國必亡期三年遠五年 春秋緯運斗樞曰彗孛出虛危間大司空行誅 郁萌曰彗星出虛危間天下亂 荊州占曰彗星出虛危間司空行誅 陳卓曰彗星出虛大水期三年 玉曆曰彗星出虛危之間其國有叛臣

兵大起將軍出行國易政期三年 按宋書天文志曰晉惠帝永康二年四月彗星見齊分是時齊王冏起兵討趙王倫倫滅冏擁兵不朝專權淫奢明年誅死宋武永初三年二月辛巳有星孛于虛危而河津掃河鼓占曰為兵喪五月宮車晏駕明年遣軍救青司二月太后蕭氏崩

危彗孛犯危

石氏曰彗孛干犯危其國有叛臣兵起大將軍出 甘氏曰彗星出危天下亂司空行誅有土功之事兵大起期二年 玄冥曰彗星出危其國有叛臣兵大起將軍出國易政若大水民飢期三年 陳卓曰彗星出孛於危帝必易有大水糴大貴

營室彗孛犯室

甘氏曰彗孛干犯營室先起兵者弱不可以戰戰必亡地主將

必亡去之去期百八十日遠二年 聖洽符曰彗星出營室有
 大水按韋昭洞紀曰漢成建始元年正月有彗星於營室三年
 秋關內大水也 聖洽符曰彗星出營室天下兵大起 齊伯曰
 彗星出室壁間兵大起若有大喪有亡國死王期不出三年按
 司馬彪天文志曰孝順帝永和六年二月丁巳彗星見東方長六
 七尺色青白西南指營室及墳墓星後四年孝順帝崩宋天文志
 曰宋武永初三年十一月戊午有星孛于室壁少帝景平元年
 正月乙卯有星孛于東壁南白色二丈餘拂天苑二十日滅是
 年兵救青司二月太后蕭氏崩黃帝占曰彗星出營室天下亂
 易政按宋書天文志曰魏嘉平三年十一月癸亥有星孛于營
 室積九十日正元二年二月李豐豐弟兗州刺史翼后父光祿
 大夫張緝等誅亂皆誅皇后亦廢九月帝廢為齊王高貴以代

立也却萌曰以五色占其吉凶黃帝占曰孛見營室中後宮
 且有亂一曰有德令按洪範天文志星辰變占曰漢成建始元
 年正月有星孛于營室青明色長六七丈廣尺餘占曰營室為
 後宮懷妊之宮彗星加之將害人性其後許皇后坐祝詛廢趙
 飛鳶為皇后弟為昭儀害兩皇子卒皆伏辜家屬徙于遼西也
 郝萌曰諸孛氣在營室人民疾疫死亡 河圖曰彗起芒臨營
 室以告咎 荊州占曰彗星干守營室則五校三軍動兵不戰
 牛馬驚不出七十日 石氏曰彗星犯守營室先起兵者不可
 以戰必亡地期三年遠六年

壁彗星孛犯東壁

石氏曰彗第干犯東壁其國起兵火災廟堂四門流血天下隔
 荊州占曰彗孛干犯東壁文章者死 郝萌曰諸孛氣入東壁

人民疾疫多死亡 巫咸曰彗星出東壁王者起兵毀壞宗廟
四門伏兵流血滂滂人民惶惶莫知其殃近期一年中期三年
遠五年 荊州占曰彗星出東壁大水民流于道

彗字犯西方七宿七

奎壁字犯奎

甘氏曰彗星干犯奎度其國君出戰大飢人相食國無繼嗣近
期一年遠三年 石氏曰彗星出奎西北舉兵伐中國其下食
石千錢天下大水 海中占曰彗星出奎有大兵起四夷來伐
中國郡君出戰天下大飢有水灾期三年遠五年 河圖曰杵
彗出貫奎庫兵悉出禍在強侯外夷相應首謀期三年遠九年
按宋書天文志曰晉惠帝元康五年四月有星字于奎到軒轅
太微經三台大陵占曰奎為魯又為庫兵軒轅為後宮太微天

子廷三台三司大陵有積尸死喪之事明年武庫火西羌反後

五年司空張華遇禍賈后廢死魯公賈誼誅又明年趙王倫篡

位於是三公與兵討倫士民戰死千餘萬人也 荊州占曰彗星

守奎魯國兵起宋書天文志曰晉成帝咸康二年正月辛巳彗
星夕見西方在奎占曰為兵喪奎又邊兵四年石虎伐慕容晁
不克既退晁追擊之又破麻秋時晁稱藩邊兵之應也

婁彗字犯婁

石氏曰彗字干犯婁國有大兵四時絕祠遠不出三年 陳卓
曰彗字干犯婁臣奪君位近期一年遠三年 海中占曰彗星
出婁國有大兵四時絕祠有亡國先旱後水人民飢死五穀大
貴糴無價期一年遠二年 陳卓曰彗星出婁六畜疫

胃彗字犯胃

石氏曰彗帚干犯胃五穀不成倉庫空虛 甘氏曰彗干犯胃其國兵起不出三年 黃帝占曰彗星出胃昂之間狀如竹竿而係此星出為兵戎此太白之變見不過一年其國兵起若有喪 巫咸曰彗星出胃大臣為亂天下兵起五穀不昇人民飢餓 京都困倉悉皆空虛期三年中五年遠七年 却萌曰彗星出胃昂之間狀如竹筭為兵灾若火 荊州占曰彗星出胃昂之間大國起兵

昂彗字犯昂

甘氏曰彗星字干犯昂度大臣亂國兵大驚期一年 春秋運斗樞曰彗星字出昂畢間大邦起王 甘氏曰彗星出見昂有喪 巫咸曰彗星出昂大臣為亂君弱臣強邊兵大起天子憂之人民驚恐國有憂主期一年中二年遠三年 按司馬彪天文

志曰光武建武十五年丁未彗星見昂稍西北行入營室犯離

宮三月乙未至東壁滅見四十九日彗星為兵又除穢昂為胡

兵至十一月定襄都尉陰承反太守隨誅之盧芳從匈奴入居

高柳至十六年十月芳降上璽綬一曰昂為獄事是時大司徒

歐陽歆事繫獄踰歲死離宮妃后之所居彗星犯之是除宮也

是時郭后已既至十七年十月遂廢為中山太后也 却萌曰彗

星出昂色赤邊有大兵謀反天子有憂 却萌曰彗星出昂赦

畢彗字犯畢

荊州占曰彗字犯畢必有死丈夫殺萬人 甘氏曰彗字干犯

畢胡為寇中國亡近期一年遠期五年 荊州占曰彗星干犯

畢邊軍大戰 陳卓曰彗字干犯畢中原流血 黃帝占曰彗

星畢觜之間小而長狀如直竿上有星壘壘然此星出為兵戎

此鎮星之變見不過一年兵起宮中女主有殃 石氏曰彗星出畢大起兵馬貴其星內指邊兵勝其星落地兵破 巫咸曰彗星出畢以胡為寇亂中國邊兵戰有流血若有七主死將期三年遠五年 黃帝占曰彗字守畢柄侯邑益土守畢口中邦相為亂邑易政邑君大臣當之 黃帝占曰彗星出附耳庶雄起陪臣反 司馬彪天文志曰孝獻建安五年十月辛亥有星孛于大梁冀州分也時袁紹在冀州其年十一月紹軍為曹公所破七年夏紹死後公遂取冀州

觜彗星孛犯觜

石氏曰彗星干犯觜雙國兵起天下動擾期一年遠三年 荆州占曰彗星干犯觜雙其國兵起破亡 甘氏曰彗星出觜雙其國兵起有失地死王天下民流大臣出戰下有亡國期三年

遠五年 石氏曰彗星出觜雙穀大貴大臣出戰期七月 劉向洪範傳曰彗星見觜雙必有破國亂君伏死其幸者按漢書天文志曰景帝中元二年三月丁酉彗星夜見西北色白長丈在觜雙旦去益小十五日不見觜雙梁也是時梁王恐懼伏斧鉞謝罪然後得免也

參彗孛犯參

石氏曰彗孛干犯參其國邊軍大敗其君亡近期一年遠期三年 黃帝占曰彗星出參伐天子更政 甘氏曰彗星出參大兵蔽地大臣謀反后有憂天子躬甲斧鉞大用兵馬馳道弓弩恒張期三年遠五年 漢書五行志曰元延三年星孛及攝提大角從參至辰並亡世嗣王莽篡也 荆州占曰彗出於參東井之間上柱煞伐長吏 黃帝占曰彗星與熒惑並見於參天子更

政一曰天子受政 石氏曰彗星見參伐大國君不吉 郝萌
曰彗第星流入參若出參其年兵起 按班固天文志曰元帝初
元五年四月彗星出西北赤黃白色長八尺所後殺日長丈餘
東北指參分後二年餘西羌及左將軍奉世擊平之

彗孛犯南方七宿八

東井彗孛犯東井

黃帝占曰彗孛干犯東井大使出野有兩軍相當不出三年
甘氏曰彗星干犯東井其國兵起 按車類秦書曰符堅九年四
月有客星出尾箕長十餘丈狀如彗而末曲或名蚩尤旗拂于
東井自夏及冬不滅太史令張益孟光奏彗起尾箕尾箕燕分
而拂東井東井秦分燕首尾亂于秦東胡鮮卑曆世稱燕今慕
容暉父子兄弟七處而不報聖朝職爵鱗次執權乘勢馳輪躍

馬貴榮莫與為二宜小抑退除其渠帥天蝮地螫手壯夫解腕
玄像告兆事應無差堅不納後慕容氏遂稱王於燕地 荊州占

曰彗星干犯東井則大臣謀其國用兵期百八十日 石氏曰
彗星出東井其國兵大起車騎滿野有軍大戰將軍有死者若
大臣有誅期三年中六年遠九年 郝萌曰掃出東井上莖煞
漸漸長上白下赤狀如矛刃此為兵災 太白之變 陳卓曰
彗星出東井民人讒言國政崩壞天下大水 陳卓曰彗在東
井大人死見三十日兵將當之見五十日相當之見七十日主
當之

鬼彗孛犯輿鬼

石氏曰彗星干犯輿鬼大兵橫行近期一年遠三年天子小赦
除咎 石氏曰彗星出輿鬼國有大兵戰死于野骸骨滿坑人

民疾病死者縱橫期不出三年王者以赦除咎則災消矣石
氏曰彗星出輿鬼名曰喪樓皆以赦解應之 荆州占曰彗星
出輿鬼有喪 陳卓曰彗星出輿鬼人民疾疫死者半棺木
貴

柳彗孛犯柳

甘氏曰彗孛干犯柳國誅大臣兵喪並發外臣凌主天下傾危
期三年 按班固天文志曰孝武建元三年三月有星孛于注張
歷太微干紫宮至于天潢其後齊東膠西江都王皆坐法削黜
自燕淮南衡山謀反而誅之 荆州占曰彗星干犯柳周國當之
九十日 黃帝占曰彗星出張注之間狀如吹火之且燃此星
出有兵災此熒惑之變見不過一年兵起國亡 巫咸曰彗星
出柳國誅大臣兵喪並起強臣凌主天下傾危其國大旱民以

飢死期三年遠五年 陳卓曰彗星出柳有兵臣凌主大旱穀
貴 詩緯含神務曰彗星守味南夷將為亂 按司馬彪天文志
曰孝明永平八年六月壬午長星出柳張三十七度犯軒轅刺
天舡大陵微氣至上階凡五十六日去柳周也是歲大雨水郡
十四傷稼

七星彗星犯七星

甘氏曰彗星干犯七星邦有亂臣國主不定兵起宮殿貴臣戮
大臣相疑近期七十日遠期百八十日 荆州占曰彗星干犯
七星其國有大兵不出百八十日 河圖曰彗孛出七星天子
與聖叶期三年聖人出 甘氏曰彗星出七星國有叛臣人主
不安兵起宮中大臣戮死貴人當誅君有水災民飢期不出二
年遠三年 按宋書天文志曰魏齊王正始六年八月戊午彗星

見七星長二尺色白進至張積一十三日滅七年十月癸亥又見軫長一尺積一百五十六日滅九年三月又見昂長六尺色青白芒西南指七月又見翼長三尺進至軫積四十二日滅嘉平元年司馬懿誅曹爽兄弟及其黨與皆夷三族京師嚴兵寔始剪魏三年誅楚王彪又襲王陵於淮南東楚也幽魏諸王于邸也郝萌曰掃星出七星張之間狀如布從風如靡此星為兵我熒惑之變也郝萌曰彗星出七星張之間狀如斂之火且燃為兵熒惑之變也

張彗字犯張

甘氏曰彗字干犯張其國外內用兵王從宮天下半亡石氏曰彗星出張天下大亂有兵王者徙宮殿天下半亡人民惶惶無有聊生見五十日期三年七十日期五年百日期七年百五

十日期九年必發

按司馬彪天文志曰王莽地皇三年十一月

有星字于張東南行五日不見後一年正月光武起兵春陵會

下頭新市賊張卬王雲及更始兵亦至俱攻破南陽斬莽前遂

大夫甄阜屬正梁立賜等然其士眾數萬人更始立為天子至

河南郡洛陽而入長安敗死光武興於河死復都洛陽

陳卓曰

彗星出張大旱穀石三千粟尤甚宋天文志曰魏明帝景初

二年八月彗字星見張長三尺逆西行三十一日滅占曰為兵

喪張周分野洛邑惡之其十月斬公孫淵明年正月明帝崩晉

武帝太康二年八月有星又字于張四年三月戊申字於西南

四年三月癸丑齊王攸薨四月戊寅任城王陵薨五月己亥瑯

琊王佃薨十一月戊午新都王該薨

翼彗字犯翼

黃帝占曰彗星干翼國用兵大臣有憂遠期百八十日 甘氏
曰彗孛干犯翼其國有大兵芒所指降伏近期三年遠期七年
孝經鈞命決曰天子失禮則孛刺翼 黃帝占曰彗星出翼
軫之間天下皆謀上國有大喪人主死亡必有大兵期不出三
年 春秋運斗樞曰孛掃出翼軫之間天下有勢皆謀 石氏
曰彗星出翼其國有喪以水為飢民多流亡視芒所指必有降
伏期三年遠六年 按宋書天文志曰魏明帝太和六年十一月
丙寅有星孛于翼近太微上將星明年孫權有遼東之敗權又
自向合肥新城遣全琮攻六安皆不克而去又今年諸葛亮入
秦川據渭南司馬懿距之孫權遣請議諸葛瑾等此江夏江
口孫韶張承等向廣陵淮陽權以大衆圍新城以應亮於是帝
自東征權及諸將乃退太和六年十二月陳王桓薨青龍元年

夏北海王薤薨三年正月太后郭氏崩也

郗萌曰彗掃出翼軫

之間狀如布從風而靡為兵災熒惑之變也

石氏曰彗星孛

翼大臣謀反壇穀貴

甘氏曰彗孛干犯軫兵喪並起期百八

十日遠一年

宋書天文志曰晉武帝太始四年正月丙戌彗星

見軫青白色二月皇太后王氏崩十月吳將施績殺江夏或寢

襄陽後將軍田章荊州刺史胡烈等破却之司馬彪天文志曰

孝獻建武十二年十月辛卯有星孛于鶉尾荊州分野時荊州

牧劉表專據荊州益州從事周群以為荊州牧將死而失土明

年秋表卒子琮自代曾公將攻荊州琮懼奉軍詣公降也

彗孛犯軫

巫咸曰彗星出軫天子崩兵喪並起滿宮門車馬無主民無定
君期三年中五年遠九年王者以赦除咎則消矣

大唐開元占經卷第八十九

大唐開元占經卷第九十

彗星占下

彗孛犯石氏中官一

彗孛犯攝提一

石氏曰彗星出攝提天下亂帝自將兵於野兵起宮中王者有憂期不出三年 郗萌曰彗星出攝提主迷惑群下爭起亦主大亂

彗孛犯大角二

齊伯曰彗孛出大角傍可六七丈天下大亂兵大起國易政期三年中五年遠七年 按洪範五行傳曰秦始皇帝三十七年五月彗星出於大角其長七尺以東北入于女御有一大星與星聞於宮中三月 五月彗星盡大星乃亡始皇以六月乙日

死于沙丘及西南行至咸陽乃禍諸子女官及九卿皆死以兵天下大亂起而攻秦遂亡又曰五月彗星出於維首十五餘日漢三年十月有彗星出于大角旬餘乃入是時項籍為楚王霸王主諸侯天下歸心於漢楚將滅故彗除位也 郗萌曰彗星出入角可七八丈天下更政 鈞命決曰天子失亡仁則彗守大角黃帝曰彗星犯守大角大兵起國不安天子失御有亡國更政令 雜書說微示曰彗星貫坐亂起 荊州曰彗星守大角人主亡

彗守犯梗河三

海中占曰彗守干犯梗河天子慎胡亂中國 陳卓曰彗守干犯梗河胡兵為敗 巫咸曰彗星出梗河四夷兵為敗胡寇亂中國若守之王者誅四夷期三年

彗守犯招搖四

陳卓曰彗守干犯招搖胡寇大動期一年 石氏曰彗星出招搖胡寇來國若胡敗 黃帝攻胡星守招搖 天官書曰漢兵伐大苑星守招搖也 石氏曰星守招搖胡主死不出二年 班固天文志曰漢孝武太初中星守于招搖其後漢兵擊大苑斬其王

彗守犯玄戈五

陳卓曰彗守干犯玄戈胡戰單于大敗期二年 玉曆曰彗星出玄戈夷狄兵起單于大敗其國破亡期一年中二年遠則三年矣

彗星犯天槍六

甘氏曰彗星出天槍王者備四夷防捍邊境若有驚恐人民憂

大亂
陳卓曰彗星守天槍鉞大用誅殺不當多梟首之民亦主

彗孛犯天棊七

聖洽符曰彗星出天棊兵大起五仗用國有憂期二年 陳卓
曰彗星守天棊兵四起

彗孛犯女牀八

石氏曰彗孛干犯女牀貴人暴誅期百八十日 齊伯曰彗星
犯女牀貴人有憂若有暴誅者一曰貴女有罪者期百八十日
遠一年

彗星犯七公九

甄曜度曰彗星出七公忠言者凶議人下獄政令不行王者信
讒邪臣在側其國憂敗

彗孛犯貫索十

春秋緯曰彗星出貫索大臣憂有反者 海中占彗星出貫索
必有反臣殺君若有大赦期百日遠一年 孝經內記曰彗星
在天獄諸侯作禍

彗孛犯紀星十一

陳卓曰彗星犯紀星天下國相擊若地震 案班固天文志曰孝武建
元三年四月星孛天紀四年十月而地震 宋書天文志曰青龍
四年十一月己亥彗星犯天紀景初元年六月地震 玄冥占
曰彗星出天紀大臣相戮兵起宮中主后憂若出走期二年遠
三年

彗孛犯織女十二

陳卓曰彗孛干犯織女后族為亂貴女有誅者期三年 文曜

鈞曰彗星出織女后黨為亂貴女有誅者若有女變期百八十
日 按班固天文志曰孝武建元三年四月有星孛于天紀至
織女其後陳皇后廢 甘氏曰彗星出見織女有降主 運斗
樞曰彗星出織女主之黨反

彗孛犯天市十三

石氏曰彗孛犯天市所犯者誅 巫氏曰彗星出天市豪傑內
外俱起執令者死大臣有誅期三年 司馬彪天文志曰孝獻
初平四年十月孛星出兩角間東北行入天市中而滅占曰彗
除天市將徙帝將易都是時上在長安後二年東遷明年七月
至洛陽其八月曹公迎上都許 何法盛中興書曰哀帝興寧元
年八月有星孛于亢入天市後有龍相誅寶之亂 車頻奏書
曰符堅建元八年五月遣少弟陽平公融鎮鄴停灞東苟太后

以融少子憂甚比發三出送之垂引夜竊往內外莫知太史令
魏述夜奏天市南門內有后妃移動之像堅檢而知之驚曰天
道與人何其不遠遂重星占

彗孛犯帝座十四

石氏曰彗孛犯帝座民人大亂宮朝徙治大臣不臣期三年
帝覽嬉曰彗星出帝座大臣為亂守之不去貴人有變更政令
不行

彗孛犯候星十五

石氏曰彗孛干犯候星兵起帝宮大國易治期三年若出候星
天下亂宗人相敗若相攻士卒有急行不出其年

彗孛犯官者十六

玉曆曰彗孛出官者左右貴人有罪若刑於市者不出二年

按宋書天文志曰魏青龍四年十一月己亥彗星犯宦者 劉向五紀論曰宦者在天市為中外有兵景初元年九月吳將朱然圍江夏荊州刺史胡質擊之二年正月討公孫淵

彗孛犯斗星十七

聖洽符曰彗星出斗星天下亂民不從市外不用事人民飢流散

彗孛犯宗正十八

甘氏曰彗星出宗正宗主有事若左右親族有死者期百八十八日遠一年

彗孛犯宗人十九

齊伯曰彗星出宗人王者同姓臣罪若親族有謀者期不出一

彗孛犯宗星二十

甄曜度曰彗星出宗星主恩薄以親為疎簡宗廟則彗出之

春秋緯曰彗星出宗星族人反

彗孛犯東西咸二十一

文曜鈞曰彗星出東咸女主淫佚自恣宮門不禁若貴女有憂

彗孛犯天江二十二

巫咸曰彗孛出天江天下大水舟舡用五穀不登其歲人相食期三年 陳卓曰彗孛干歷天江大兵攻王國王者以赦除之則國豐平

彗孛犯建星二十三

陳卓曰彗孛干犯建星王失道忠言者誅賢士逃亡 黃帝曰彗星出建星道路不通多盜賊子攻父弟攻兄守之則有大兵

將軍出行期一年遠三年

彗字犯天弁二十四

帝覽嬉曰彗星出天弁寶玉大貴若糴貴五培萬物不興其國
飢 郝萌曰彗星入若守天弁者皆為囚徒起兵

彗字犯河鼓二十五

郝萌曰彗星入河鼓且有兵 黃帝曰彗星出河鼓天下兵起
大將出謀旗鼓立若守之有死將守中星大將死守旁兩星小
將死期一年中三年遠五年

彗字犯離珠二十六

石氏曰彗字犯離珠後宮為亂若宮人有誅守之陽為大旱陰
為大水五穀不登人民飢

彗字犯匏瓜二十七

石氏曰彗字二犯匏瓜政亂近臣相譖宮有戮死者王者以赦
除咎 玉曆曰彗星出匏瓜人主因食瓜而亡若果中有藥害
其君若食宮憂 玉曆曰彗星守匏瓜魚鹽貴十倍果物不成
民灾

彗字犯天津二十八

石氏曰彗星犯天津賊斷王道 郝萌曰彗星干犯入漢中有
亡國當其野者變之 甘氏曰彗星出天津關津不通若關吏
有憂若守之天下大亂津河隔塞有旱災期三年 雒書摘亡
辟曰彗星見漢中亡君之戒 何法盛中興書曰安帝隆安四
年十一月星孛于貫索及天市中天津其時元顯輔政刑罰不
中故掃貫索發徭無度故掃天市建士失節故掃天津津關
通万川利關梁也天市貨財帛周百姓也貫索平察刑獄無枉

濫也而元顛皆反之天若曰掃除穢惡令改革也顛不悛遂致覆滅

彗孛犯王良二十九

運斗樞曰彗星出王良好遊馳奉車反 齊伯曰彗星出王良兵馬大動車騎行天下有急馬多死一日水道不通津關塞期二年遠三年 宋書天文志曰魏陳留王咸熙二年五月彗星見王良丈餘色白東南指積十二日滅占曰王良天子御駟彗星掃之禪代之表除舊布新之象白色為喪王良東壁宿又并州之分野八月晉王薨十二月帝遜位于晉

彗孛犯騰蛇三十

陳卓曰彗孛干犯騰蛇水道不通天下隔期二年 聖洽符曰彗星出騰蛇以水雨為害大水出万物不成人民飢一日水虫

為敗

彗孛犯閣道三十一

陳卓曰彗孛干犯閣道王者居正道殿不私行則灾自消 甄曜度曰彗星出閣道天子津不通兵大起御道有伏兵欲謀其主王者宜備之

彗孛犯附路三十二

陳卓曰彗孛干犯附路道不通天下半隔期一年 海中占曰彗孛出附路天下大飢車騎滿野道中縱橫人主臨兵期三年遠五年

彗孛犯天將軍三十三

玄冥占曰彗星出天將軍兵大起將軍出旗陳立若守之大將死若有誅期不出二年

彗孛犯大陵三十四

文曜鉤曰彗星出大陵國有大喪有土功墳陵之事若守之天子崩明審期不出三年遠五年 春秋緯曰彗星出大陵天子以不慈見犯復出之將反

彗孛犯天舡三十五

春秋緯曰彗星出舟星外夷侵 巫咸曰彗星出天舡天下大水舟舡用事若外夷來侵水兵起期一年 按司馬彪天文志曰漢孝明帝永平三年六月丁卯彗星出天舡北長二尺所稍北行至亢南百三十五日去是歲伊維水溢到津城門壞伊橋郡七縣三十二皆大水 宋書天文志曰晉穆帝升平二年五月丁亥彗星出天舡在胃宿中四年五月天下皆大水

彗孛犯五車三十六

石氏曰彗孛干犯五車兵滿野天下半傾百姓徙居去其土期三年 黃帝占曰彗孛星出五車兵大起車騎行有攻戰糴大貴人民飢彗若守之先起兵者昌後起兵者亡期三年 春秋緯曰彗星出五車穀霜兵起主賣位天下賢名起

彗孛犯卷舌三十七

帝覽嬉曰彗孛出卷舌人主用讒言誅忠臣貴人有戮死者一曰民多言訟不出年 春秋緯曰彗星出卷舌主以聽讒之禍遇殺大臣反 按宋書天文志曰宋文帝元嘉二十八年五月彗星見卷舌入太微過帝座犯上相拂屏出端門滅翼軫三十年天子巫蠱呪咀事覺遂以殺逆害朝臣孝建元年荆江二州反皆夷滅卷舌呪咀之象彗之所起是其應也

彗孛犯天關三十八

石氏曰彗星出天關兵大起道路不通民多盜賊必有關塞之事人主有憂。玄冥占曰彗星出天關而守之天下道絕國多盜賊關梁不通人主有憂期一年遠二年。

彗孛犯南北河戒三十九

海中占曰彗星出南河蠻越兵起邊城有憂若關吏有罪者

郝萌曰彗星出天高廟臣反名侯王起。海中占曰彗星守南

河為大旱出北河夷為亂來侵中國若守胡軍敗又曰守北河

為大水期不出三年。石氏曰朝鮮之伐星拂河戒。按班固

天文志曰漢武帝元封中星孛于河戒其後漢兵擊拔朝鮮北

為樂浪玄菟郡。石氏曰彗孛干兩戒間天子出走大臣親盛

王者以赦咎

彗孛犯五諸侯四十

石氏曰彗孛干犯五諸侯王室大亂兵起天子宫廟不祀。春

秋緯曰彗星出五諸侯州牧反九州合謀。玉曆曰彗星出五

諸侯執政臣有謀若有被戮者貴人當之人主有憂期一年遠

二年。司馬彪天文志曰孝獻建安十七年十二月有星孛于

五諸侯時周群以為西方專據土地者皆將失亡是時益州劉

璋據益州漢中太守張魯別據漢中韓遂據涼州宋建別據枹

罕明年冬曹公遣偏將擊涼州十九年獲宋建韓遂逃于羗中病

死其年秋璋失益州二十年秋公攻漢中魯除也

彗孛犯積水四十一

石氏曰彗孛干犯積水兵起宮門宗廟毀絕大臣有憂天下大

亂

彗孛犯積薪四十二

石氏曰彗孛干犯積薪有亂臣在宗廟

彗孛犯水位四十三

石氏曰彗孛干犯水位水道不通伏兵在水中以水為害

甘氏曰彗孛出水位天下以水為憂有兵起五穀不成人民飢

流散

彗孛犯軒轅四十四

石氏曰彗孛干犯軒轅近臣誅滅宗族王者以赦除咎 黃帝

曰彗星出軒轅皇后有憂若失勢宮人不安人主有憂 春秋

緯曰彗星入軒轅皇后族亂 運斗樞曰彗孛出軒轅女妃為

寇 石氏曰彗星犯軒轅天下大亂易王以五色占期 黃帝

占曰彗星入軒轅若守之天下大亂易王宮門當閉若女主死

期三年遠五年

彗孛犯少微四十五

石氏曰彗孛干犯少微白衣聚者凶術士不顯智者逃亡期三

年 巫咸曰彗星出少微多能臣有戮者若上臣有罪一曰法

令臣有誅者 石氏曰彗星出少微士夫起 宋書天文志曰

魏黃初六年十月乙未有星孛于少微歷軒轅占曰孛彗為喪除

舊布新之象是時帝軍廣陵幸田親御甲冑跨馬觀兵明年五

月文帝崩

彗孛犯太微四十六

春秋緯曰彗孛第于太微天下亂 陳卓曰彗孛干入太微帝

宗后族為亂亡社稷一曰所犯者亡 聖洽符曰彗星入太微

庭中臣謀主有兵起王者灾社稷其國憂期百八十日遠一年

郗萌曰赤黃星狀如帚入太微婦女喜心出太微天子賜諸

侯美女 春秋緯曰彗若出犯執法御史反 運斗樞曰彗孛
 出若干太微法式滅帝死於野 春秋緯曰彗星出而弗太微
 天下亂不過三五必易政以色占期 按司馬彪天文志曰孝
 灵光和五年七月彗星出下台東南行入太微至太子幸臣二
 十餘日而消彗入太微天下易主至中平六年宮車晏駕孝獻
 建安二十三年三月彗星晨見東方二十餘日夕出西方犯歷
 五車東井五諸侯文昌軒轅后妃太微鋒支指帝座二十五年
 正月魏文帝受禪 玉歷曰彗星出太微帝宗后族為亂大臣
 弒主謀在親戚御臣王者有憂期三年 石氏曰彗星出太微
 中宮火大起殺人
 甘氏曰彗星出太微天庭中有立王若徙王 孝經雌雄圖曰
 彗在太微君害臣 玉曆曰彗星犯太微天子妃后去宮人不

安主有憂

彗孛犯黃帝座四十七

石氏曰彗孛如粉絮入太微犯守帝座國有崩喪大臣立主石
 氏云王者以赦除咎 天下大亂兵起若犯守四帝輔臣有誅執
 政者亡期三年 石氏曰彗星如粉絮犯座星兵喪並起又大
 彗第干犯座星王者亡子孫不昌王者循孝于天奉宗廟郊祠
 則灾除 雜書說徵示曰彗刺帝座四旁中大亂 荊州占曰
 星銳如劍正赤直抵座星天子驚兵一曰驚火又云星如直帚
 抵座星旁左右諸臣兵起内亂 陳卓曰星狀如帚正赤抵聖
 座星婦女兵

彗孛犯屏星四十八

玉曆曰彗星出屏星守衛臣有謀若有罪執法者當之

彗孛犯即位四十九

陳卓曰彗孛干犯即位臣失勢 運斗樞曰彗出即位即官謀反天子因官郎位所主之官也 玉曆曰彗星出郎位左右守衛為亂若有謀者人主警備之

彗孛犯即將五十

玉曆曰彗星出即將大將有誅若有罪一日大臣為亂有兵起四起

彗孛犯常陳五十一

甘氏曰彗星出常陳若守之王者出誅左右守衛之臣一日若防守者有死期三年

彗孛犯三台五十二

黃帝曰彗星出上台司命有兵起大臣三公有自出者若守之

貴臣有誅上公有憂期百八十日遠一年 黃帝曰彗星出中

台司中奸臣有謀兵大起貴人當出彗若守之中公有罪若憂誅 黃帝曰彗出下台司祿近臣有罪若憂死若守之貴人多

死下公當之將憂皆不出二年 運斗樞曰彗星出三台西相

反出其中太尉反出其東大司馬反 按韋昭洞紀曰漢靈帝

光和五年彗星出下台十月太尉許盛免 孝經內記曰彗在

三台臣害君者也 宋書天文志曰晉惠帝太安二年三月彗

見東方指三公占曰兵喪之象三台為三公是年冬成都河間

攻洛陽三年正月東海王越長沙王反張方殺之 雌雄圖曰

彗星出三台有陰謀奸執起一日宮中火起一日臣害君禍大起

彗孛犯相星五十三

陳卓曰彗孛干犯相星輔相憂不出一年天下變更其令民多

移徙

彗孛犯天牢五十四

雌雄圖曰彗星出天牢諸侯作禍相賊害 荊州曰彗星出天牢豪傑中外俱起 齊伯曰彗星出天牢貴人多下獄者若大臣有戮其國亡期百八十日遠一年

彗孛犯文昌五十五

石氏曰彗孛干犯文昌則輔臣受殃近期三年遠六年 運斗樞曰彗星出文昌上將軍反出次將左右將軍反出貴相大司徒反出司祿得勢大臣反出司命天下有權者俱反亂尤甚 合誠圖曰彗星出而第文昌天下大亂政以色占 甘氏曰彗星出文昌若守之天下大亂大臣受殃國易政各以五色占之近期一年中二年遠三年

彗孛犯北斗五十六

春秋緯曰星第于北斗中有確聖人受命天子 潜潭巴曰星孛于北斗璇璣更授天子起走 感精符曰孛賊入北斗中者大國結謀伐天子運樞行之主号諸侯爭權天下皆叛兵合禍構逆亂之變也 辨終偈曰彗入北斗帝宮空 按韋昭洞紀曰項王六年彗星入北斗晉趙盾率諸侯平周亂立王子樊是為匡王 宋書天文志曰義熙十四年五月壬子孛于北斗魁中癸亥彗星出太微西柄起上相星下芒衡長至十餘丈進掃北斗紫微中占曰彗出太微社稷亡天下易王入北斗紫微帝宮空一曰得聖主是年宋高祖受宋公恭帝元熙元年七月黃帝遜位高祖入宮也 感精符曰星孛入北斗兵大起將有以外制權以兵為政者 坤靈圖曰至德之萌黃星孛于北斗

必以戊己日其光無芒文行無武動事莫之敢拒者 漢含孳
 曰彗星入北斗強國亂 鈞命決曰周襄王不能事其母孛入
 北斗 甘氏曰彗彗流入北斗魁中得名人其不入北斗魁失
 名人 劉向洪範傳曰孛入于北斗邪亂之臣將弑其君 京
 房曰星孛入北斗則大臣叛 郝萌曰赤星入北斗中國使白
 奴 荆州占曰彗星流入北斗諸侯戮春秋期三月秋冬期一
 年 黃帝曰彗星出北斗長可八九尺天下更政易王暴兵卒
 起期百八十日若一年 春秋緯曰彗星出北斗九星中九卿
 反如星所主其政毀其人亂 潜潭巴曰彗星芒出於斗樞天
 子亡諸侯息 雌雄圖曰彗星出北斗中宮中火起 石氏曰
 彗星出北斗長可七八尺天下大亂國易政有兵起若大戰先
 起者亡中起者殃後起者昌期三年中五年遠九年 海中占

曰彗星出北斗大臣謀反兵大起 按洪範天文星辰變占曰

漢武建元三年三月有星孛于王良芒自太微經斗內至天漢

其後濟東王膠東王江都王皆坐法削黜自殺衡山王反誅之

也 又曰若入斗魁大臣誅死若被誅三日乃占春夏期三年

秋冬期一年 魏氏圖曰帚星出于斗中者宮中失火燒寶

郝萌曰彗星出北斗長可八九丈名曰勉功弛功出天下更政

荆州占曰彗星出北斗之中反而入北斗後將得大臣其出

北斗七大臣其一西一東害於侯公一南一北戒其金革一入

一贏天下不寧 荆州曰彗星出北斗中聖人受命 玄冥曰

彗星出北斗必有大戰流血若入斗中得名將不入斗中失名

將各以其日占知其國不出其年 石氏曰孛星出北斗中大
 臣諸侯有受地者 巫咸曰彗星見於北斗天下更政 洪範

傳曰孛星見北斗中大臣諸侯有受誅者一曰受兵 甄曜度
曰彗孛貫北斗下有傑王五軍合 演孔圖曰彗星守北斗天
帝謀易王 春秋緯曰彗星守北斗強國發諸侯爭天下 海
中占彗孛守北斗強國發兵大臣爭權大人有憂國易其主天
下不寧守之三日以上大臣當誅期三年遠五年 按左氏傳
魯文公十四年七月星孛于北斗周史史叔服曰不出七年宋
齊晉之君皆將死亂後十六年宋襄夫人使昭公田孟諸而弒
之十八年齊門職反邴歆弒懿公於申記宣公二年晉趙盾弒
靈公於桃園杜預曰史服但言事不論其占服虔曰晉趙盾弒
靈公也 春秋緯曰彗星出輔星庶雄起陪臣反

彗孛犯紫宮五十七

感精符曰星孛于紫宮將有陰謀反者 陳卓曰星孛于紫宮

有大變拔兵上殿一曰入紫微宮有奇令 春秋緯曰彗星入

紫微宮其國謀反 黃帝曰彗星出而抵紫宮天下大亂 荆

州占曰彗星出長垣邊反 又曰彗星而抵紫宮天下易政

按司馬彪天文志曰孝靈中平五年二月彗星出奎逆行入紫微

宮復出六十餘日乃消占曰天下易主明年宮車晏駕 韋昭

洞紀曰漢黃龍元年三月有星孛于王良閣道入紫宮十二月

宣帝崩 黃帝占曰彗星出紫宮入守之宮中有兵天下大亂

有亡主國易政以五色占其國期百八十日中一年遠三年

按司馬彪天文志曰孝獻建元九年十月有星孛于東井輿鬼

入軒轅太微十一年正月有星孛北斗首入斗中尾貫紫宮及

北辰占曰彗掃太微紫宮人主易位其後魏文帝受禪 司馬

彪天文志曰孝章建初二年十二月戊寅彗星出婁二度長八

九尺稍入紫微宮中百六日稍滅大人忌後四年六月癸丑明德皇后崩 荊州曰彗星守天子宮有亂天子之政者

彗孛犯北極鉤陳五十八

春秋緯曰彗星入樞名人起相誅天下亂 玄冥曰彗星出北辰臣謀弒主有自立王彗耀刺下為寇害期一年 春秋緯曰彗星入樞期八年五霸起帝主亡 荊州占彗星刺天樞五精之類謀 黃帝占彗星入守北辰除舊布新三王立五旗生有瑞命之應名人起兵天下大亂君臣相誅期不出百八十日中一年遠三年 石氏曰彗星出鉤陳臣弒其主若入守鉤陳幸臣亂宮若有誅者期不出一年遠三年

彗星犯天一太一五十九

黃帝曰彗孛干歷天一則宮門不閉王者內不安近臣亂不出

三年

彗星犯石氏外官

彗孛犯天庫樓一

春秋緯曰彗孛出天庫樓兵動驚主泣血下不聽 石氏曰彗星出樓庫天下兵起車騎滿野庫兵用一曰民以飢兵起期三年

彗孛犯南門二

玉曆曰彗星出南門有兵起兵器用若道路不通

彗孛犯平星三

齊伯曰彗星出平星執法臣憂政令不行國失綱紀 石氏曰彗星出平星主以峻法為過海內亂

彗孛犯騎官四

春秋緯曰彗星出騎官英雄起天子憂 甘氏曰彗星出騎官
士卒發用兵騎出若守之將軍若有死者期三年

彗字犯積卒五

甄曜度曰彗星出積卒為謀星去疾謀不成若守之主將有憂
春秋緯曰彗星出積卒衛士並為亂禍不成

彗字犯龜星六

文曜鈞曰彗星出龜星珠玉有出者寶物大貴若守之君臣不
和上下乖離

彗字犯傳說七

春秋緯曰彗字出傳說主以祠非其神失禮為內外所謀巫祝
起天下匿譖在宮中 石氏曰彗星出傳說王者後宮少子孫
若守之有絕祀之君

彗字犯魚星八

春秋緯曰彗星出魚星后黨反 玉曆曰彗星出魚星天下大
水海魚出名水溢若守之天下大水一作旱魚行人道不出其
年亦主民變

彗字犯杵星九

甘氏曰彗字出杵星歲大飢有兵起民以米粟為憂若絕軍糧
大亂

彗字犯鱉星十

聖洽符曰彗星出鱉星有大水白衣之會若有水令若守之其
國大旱

彗字犯九坎十一

齊伯曰彗星出九坎有水旱之灾出南則大旱出北則大水

大曆四年卷之二
彗孛犯敗曰十二
甄曜度曰彗星出敗曰天下有急兵當於米粟之事國有憂期
二年

彗孛犯羽林十三

春秋緯曰彗星出羽林軍人之反 海中占曰彗孛出羽林兵
起宮中臣弒其主大人被甲有七國若守之三十日國破主亡
期三年 春秋緯曰彗星出壘城校尉以反軍成

彗孛犯北落十四

玄冥占曰彗星出北落若守之兵起大戰若殺大將人主自將
兵於外四夷作亂期三年遠五年

彗孛犯土司空十五

文曜鉤曰彗星出土司空兵大起有土功事若營室一曰大將

憂期一年

彗孛犯天倉十六

巫咸曰彗孛出天倉兵革大起粟大出天下民飢以粟為憂若
有轉輸之事 海中占曰彗星出天倉天下粟出若守之久國
無儲糧人民飢期三年

彗孛犯天囷十七

巫咸曰彗星出天囷倉庫虛空無儲積有出粟天下大飢人民
流移期二年

彗孛犯天廩十八

帝覽嬉曰彗星出天廩其國大飢倉粟出廩人餓死其分兵起
期不出三年

彗孛犯天苑十九

春秋緯曰彗星入天苑都護反 黃帝曰彗星出天苑兵大起
馬多發牧畜不蕃多有死者一曰禽獸麋鹿多死 按司馬彪
天文志曰孝安永初三年十二月乙亥彗起天苑南東北指長
六七文色蒼天苑為外兵起是後羌兵討賊杜季貢又使烏丸
擊鮮卑又使中郎將任尚護羌校尉馬賢擊虜皆降之

彗孛犯參旗二十

春秋緯曰彗星出天弓暴骨將死死尸滿谿流血千里 石氏
曰彗星出參旗天下大亂兵起弓弩用大將出有變一曰弓弩
大貴期三年

彗孛犯玉井二十一

玉曆曰彗星出玉井兵大起強地失地一曰彗守玉井天下大
水河海溢流人多沒死

彗孛犯屏星二十二

甘氏曰彗星出屏星大臣有戮國有憂 一曰彗守屏人民疾疫
有移國

彗星犯廁星二十三

聖洽符曰彗孛出廁大人有憂若廁有謀兵欲害主 一曰彗星
入廁天下飢人相食期二年

彗孛犯矢星二十四

齊伯曰彗孛出矢星若守之貴人多患腹而死若人民多死以
五色占黃則吉青白疾黑死

彗孛犯軍市二十五

甄曜度曰彗孛出軍市大兵起軍糧絕天下大亂將士離散兵
多死亡期二年

彗孛犯野雞三十六

海中占曰彗星守野雞大將死軍市破諸侯相攻有亡國期三年

彗孛犯狼星二十七

黃帝曰彗星出狼國有急兵名將出行將軍有憂若守之必有千里之行大戰流血死者大半期三年中五年遠七年 運斗 樞曰彗星出狼弧主以恣侵為遇外夷反

彗星犯弧星二十八

石氏曰彗星出弧星弓矢大用大兵起其國亂驚人民不寧多盜賊 按司馬彪天文志曰孝靈光和三年冬彗星出狼弧東行至于張及去後四年京都發兵擊黃巾賊 彗星犯老人星二十九

巫咸曰彗星出老人其色黃王者昌若守之赤彗三芒人主受殃老者不康

彗星犯天稷三十

海中占曰彗星出天稷歲大飢五穀不成人民流亡社稷不安兵亂

彗星犯甘氏中官三

彗星犯天理一

春秋緯曰彗星出天理大司空斬將逐天子

彗孛犯策星二

石氏曰彗孛星近策星王者不宜出宮下有謀亂不過七十日之內

彗孛犯造父三

陳卓曰彗孛入造父若守之僕御謀弒主有斬死者兵盡起大亂

彗孛犯卧星四

春秋緯曰彗孛出卧星尚書反人星一名卧星也

彗孛犯扶筐五

陳卓曰彗星出扶筐將作反

彗星犯酒旗六

春秋緯曰彗星出酒旗主以酒過為相所害

彗孛犯諸王星七

春秋緯曰彗星出諸王星諸侯稱王皇以南吳楚北燕趙齊宋西秦晉

彗星犯司恠八

春秋緯曰彗星出司恠主多妖祥僻偏起大臣侯王代主位

彗星犯天高九

春秋緯曰彗星出天高廟臣反名王起改號

彗孛犯天潢十

春秋緯曰彗星出天潢但聞之將反

彗孛犯天街十一

運斗樞曰彗星出天街五侯並起天子自理海中占彗星出天街內有賊人

彗孛犯甘氏外官四

彗孛犯斧鑕一

春秋緯曰彗星出斧鑕淫兵多主以妄誅將拔之臣反

彗孛犯闕兵二

春秋緯曰彗星出闕丘帝滅

彗字犯巫咸中外官五

彗字犯長垣一

甘氏曰彗星出長垣大臣謀反兵起宮中天下有亂亡國人主有憂期不出二年 春秋緯曰彗星出長垣邊反

彗字犯天廐二

陳卓曰彗星出天廐守之天下名廐有失火者若移徙一曰天下廐車馬有恠 春秋緯曰彗星出廐官法令為法度殺起變 臣執主勢

大唐開元占經卷第九十

大唐開元占經卷第九十一

風占

風名體

歸藏曰乾出積石風穴之琴琴 河圖帝通記曰風者天地之使也 易文言曰雲從龍風從虎 易說曰巽為風撓萬物者莫疾於風風以動之 廣雅風伯字飛廉 元命包曰陰陽怒為風 五經通議曰陰陽散者為風風氣無根 京房曰宮風聲如牛鳴穿中隆隆如雷鼓響商風聲如離群之羊如縛彘起微風如奔馬炎火如縛彘駭起如扣銅鐘如飛集之羽如流水嗟嗟最感人羽風如擊濕鼓如流水揚波激氣相答如麋鹿子鳴角風之聲如千人語殷殷然令人悲哀如人叫啾啾如千人呼如雞登木宮風近十里中百里遠千里羽風近六里中六十

里遠六百里徵風近七里中七十里遠七百里角風近八里中
 八十里遠八百里商風近九里中九十里遠九百里 宮風為
 君商為臣角為事羽為物徵為令 宮風數一為君為身 徵
 數三為宗廟為先人 羽數五為境界為妻財 商風數七為臣
 民為孫僕 角風數九為疾疫為死喪 黃帝曰風之動皆不安
 也初遲後疾其來遠初急後緩其道近從鳴條以上百里風也
 拔木五百里飛沙千里 凡宮風起近十里中百里遠千里五
 音倣以為例 大風一日一夜為邑二日三日為國四日五日
 為州六日七日為天下若風乘王為人君乘相為大臣乘休為
 官緩乘廢為吏人乘因為凡庶下隸 易稽覽圖曰太平之時
 陰陽和風雨咸同海內不偏地有險阻故風遲疾雖太平政猶
 不能均同也唯平均乃不鳴條故風於亮亮者陳留也 陳留大

地平均千里無故得風之政故於陳留也 降陽為風降陰為雨

是故陽還其風必暴陰還其雨必暴 降陽之風動不鳴條降

陰之風潤不破塊 還風者善令還注云還暴也君出善令

有益百姓君弱君強還而不行陽氣道積不得以時降後得同

類并故不暴 管輅別傳曰輅過清河見太守時天大旱輅言

今夜當雨云星中已有水氣樹上既有少女徵風樹間又有陰

鳥和鳴又少男風起眾鳥亂翔其應至矣須臾果有雷聲動天

風雲並興玄氣四合大雨河傾 山海經曰法獄之山有獸焉

其名曰山獬音禪又九法切 其行如風言疾見則天下大風

王子年拾遺記曰伏羲坐于方壇之上聽八風之聲乃畫八卦

淮南子曰物類之相應玄妙深微論辨不能解故東風至而
 酒沉溢注云東風木風也酒沉清酒也米物不沉故曰沉味酸

風入酒故醉而沉者沸溢物類相感也 淮南子曰虎嘯而谷
風起 烏鵲識歲之多風去高木巢扶枝扶傍也 風俗通曰飛
廉風伯也 周禮以燭燎祀風師風師即箕星也 箕主簸揚致
風氣 易巽為長女長者伯故曰風伯 物理論曰風者陰陽
氣激發而起者也 猶人之內氣見喜怒哀樂激起而發也 故春
氣濡其風溫以喜和風也 夏氣隆其風燥以怒怒風也 秋氣勁
其風清而貞清風也 冬氣石其風燥以烈固風也 此四正之風
也 又有四維之風 東北明庶風庶物出幽入明也 東南融風其
道以長也 西南清和百喜備成也 西北不周萬物潛藏也 此八
風者方土異氣徐疾不同和平則順逆則凶非有使之者也 氣
積自然怒則飛沙揚礫發屋折樹喜則不搖枝動草順物布氣
天地之性自然之體也 抱朴子曰用兵之要唯風氣為急扶

搖獨鹿之風大起軍中軍中必有反者風高者道遠風下者道
近風不鳴葉者十里鳴條搖枝四百里折大枝五百里仆大木
千里折大木五千里三日三夕天下盡風二日二夕天下半風
一日一夕萬里風 遁甲巫咸鈴曰香風不清則八風相乘則
王者有事注云香風者風清而香音長也 順四時來春以甲乙
夏以丙丁秋以庚辛冬以壬癸此香也 風刑來則五穀不登兵
革並興也 兵書曰風從震來名曰嬰兒風主人勝客

祥風

尚書大傳曰舜將禪禹于時八風循通 援神契曰德至八方
則祥風至 益鐵論曰周公載已而天下太平當爾之時風不
鳴條雨不破塊旬而一雨雨必以夜 論語識曰舜烈風雷雨
不逆 京房易傳曰聖人所處百里風雨雷霆俱起賢人在位

天道報風如節候專風厥風雨疾樹不搖不脩道厥風不搖草
飛候占曰何以知聖人隱也風清明其來長久不動搖物此有
龍在下 董仲舒曰太平之世風不搖條開甲散萌而已 抱
朴子曰黃帝風經云調長祥和天之喜風也 尚書中候曰仲
月辛日昧明禮備至于稷榮光出河休氣四塞白雲起因風搖
帝立壇磬西向 尚書洪範休徵曰聖時風若

八風

周公時訓曰小暑之日溫風至立秋之日涼風至 周禮保章
氏曰以十有二風察天地之和命乖別之妖祥鄭玄注云十有
二辰皆有風吹其律以知和否其道亡矣 春秋傳曰楚伐鄭
師曠曰吾驟歌北風又歌南風不競多死聲楚必亡 禮記月令
曰孟春之月東風解凍 禮記曰風萌也養物成身所以八風

者象八卦也

樂動威儀曰風氣者禮樂之使萬物之首也物

靡不以風成爨風順則歲美風暴則歲惡 考異郵曰八風殺

生以節翔翔距冬四十五日條風至條者達達者生也 距猶起

也自冬至後四十五日而立春以風應其方而來生萬物也四

十五日明庶風至明庶風迎惠 春分之候言庶衆言陽以施惠

之恩德迎衆物而生之也 四十五日清風明至清精芒挫收立

夏之候挫猶正時齊麥之屈秀出已備故止其鋒芒收之使成

寔也 四十五日景風至景風者強也強以成之夏至之候也強

言萬物壯之也 四十五日涼風至涼者寒也以閉立秋之候也

閉收也言陰寒收成萬物也 四十五日閭闔風至閭闔者當寒

寒天收秋分之候閭旺時旺收物蓋藏之闔或為當也 四十五
日不周風至不周者不交也陰陽未合也 立冬之候也未合言

消息純坤也月令曰天地不通不閉成寒四十五日廣莫風至

廣莫者精大滿冬至之候也廣大莫續為上通無莫之言冬無

見者風精大滿美無不備之也風之為言萌也其立字虫動於

凡中者為風虫動于凡中言陽氣不周明昆虫之屬得陽乃生

遇陰則死故風為陰中之陽也易是類謀曰冬至廣莫風至立

春條風至立夏清明風至夏至景風至立秋涼風至秋分閭闔

風至立冬不周風至五經通義曰君從臣令則風而不雨政

令苛則暴風折擊條風至則王者赦小罪出稽留明庶風至則

正封疆脩田疇清明風至則出幣帛使諸侯景風至則辨大將

封有功涼風至則報土功禮四鄉閭闔風至則懸解懸垂琴瑟

不張不周風至則脩宮室完邊城廣莫風至則誅有罪斷大刑

爾雅曰四氣和為通正謂之景風李淳風曰景風太平之風

也南風謂之凱風東風謂之谷風北風謂之涼風西風謂之大

風勢輪謂之類郭云風從上下扶搖謂之焱從下上也風興火

為尾音毛熾燥陰只迴風為飄日出而風為暴風而雨土為霍

陰而風為曠呂氏春秋曰何為八風東北曰焱風一日融風

東方曰滔風一日明庶東南曰薰風一日清風淮南子曰景風

南方曰臣風一日凱風西南曰凄風淮南子作涼風北方曰寒

風一日廣莫西方曰颺風一日閭闔西北曰廣風一作不周

怒風

抱朴子曰抑揚奔厲天之怒風也通卦驗曰巽氣不見則歲

中多大風發屋揚沙禾稼盡拔應在其衝巽氣見夏至之分則

風氣過度必大風折禾夏三月候卦氣皆不至則大風折木

發屋期百二十日二旬地動應之大風期在衝巽四月春去

大風折木傷五穀 尚書金縢曰周公居東二年秋大熟禾獲

天大風雷電禾盡偃大木斯拔邦人恐王與大夫盡弁以啓金

縢之書乃得周公所自以為躬代武王之說所藏請命冊書本

天乃雨反風禾盡起 尚書大傳曰維千有四祀天大雷疾雨

發屋折樹帝乃沉首而笑曰明哉夫天下非一人之天下也

京房曰宮風音如雷鼓發屋折木怒也有土功宮主土也人君

內亂宮為君發屋折木自動其心故內亂不出百十日宮教有

所之風以動之有其亂不安故有所之也且有急令風必有急

令也貴人相捕斬亂則君臣相疾疑慮積忍恐其傷已迭相捕

斬也來年兵起貴賤相誅下不堪令故天下兵起盜賊滿市民

飢不已貴人誅兵卒起令不行賊人滿市車馳馬奔流移不止

宮為主土動故民移君亂則兵起車馳但有急令應占則下事

皆發也 徵風發屋折木不出五日十日糴大貴民以水為敗若

大喪妃后黜寶物出 商風發屋折木不出七日七十日有急

令兵大起糴大貴國四門閉兵從中起國四門閉者闕梁不通

城邑圍杜而脩守角風發屋折木不出九日有急盜聞戰糴大

貴飢人相食有大喪有疾癘之事 天鏡曰飄風飛衣絲於市

中不出一一年必有殺主 飄風入宮闕中一日再三名曰太陽

戎不出一一年兵內起 晝昏有風聲而無風凶殃外至臣共欺

君不出一千日迴風入人室飛衣物有驚恐事 急暴風入舍發

屋折木不出六十日有相殺若入宮殿人主亡 易流演曰巽

初六斗指東南維食時青氣出直巽不至則歲風發屋揚沙禾

稼盡發應在衝 京房易傳曰暴風濁池折木飛車上屋必有

大亂令 大暴風折旗裂帷帳幕師有憂君 易妖占曰暴風

折杜邑大夏折木且有急令獨祿風入宮人主死飄數相從入
殿門有凶憂民亡飄留君門一日一夜不去亂兵在門獨祿者
迴轉風也 尚書洪範咎徵曰蒙恒風若君行蒙暗則常風也
漢五行志曰貌言視聽以主四氣皆亂其罰常風 周書時
訓曰小暑之日温風不至國無寬教立秋之日涼風不至國無
嚴政 禮記月令曰孟春行夏令飈風總至季春行秋令賊風
來 潜潭巴曰疾風拔木諛臣恚用忠臣辱 天赤有大風發
屋折木兵大起行千里 漢五行志曰昭帝元鳳元年燕王都
薊大風拔宮中樹七圍以上六枚壞城樓後燕王誅 魏略曰
正始九年商風大起數十日發屋折木動太極殿東閣正朝大
會風又甚傾柸案曹爽將誅之徵毋丘儉及景王率眾征之是
日大風行道人頭相觸 北燕錄曰飄風入征南大將軍姚照

第至于司徒公第而散或問閔尚曰是何恠乎將伐耶尚
曰風為號令吹塵去穢後必有兵去奸匿之禍但未審是誰當
之入司徒公第而止者勢力所歸爾 六韜曰人主好畋獵畢
弋則歲多大風禾穀不實紂嘗六月獵于西土其年大暴風飄
牛馬發屋拔木民人飛揚數十里 淮南子曰人主之精通於
天故誅暴則多飄風 兵書按要曰孫子稱三軍方行大飄風
起於軍前右周繞軍其將亡左周軍中其師良 王隱晉書曰
譙周字彥紹周小字也家有回風從申上來吹用前書紙飛揚
周曰不出十日陳敏當死果如其言 京氏別對災異曰回風
起何風者天之號令也當直而正普而不偏佞人眾君迷惑則
回風起不救則致迷風起其救也用公直去邪枉灾消矣 狂
風發何人君政教無法為下所逆則致狂風發泄其救也脩政

教聘賢士狂風消矣 人君賊良善使命數變則暴風折木發屋鳴瓦或害殺人其救也脩舊典任忠臣思過自改則風灾消矣 黃帝曰暴風氣卒起於東方為天下飢民流盜賊相劫卒起東北方鬼行人道為旱疫病卒起西方食物不入人病慄瘡疥卒起西方秋早霜物不成卒起西北方人多病 春秋繁露曰恩及金石則涼風出王者與臣無禮身不肅敬則木不曲直而夏多暴風風者木之氣其音角故應也 國語曰海鳥曰爰居虞翻注曰海水之鳥名曰爰居一名雜懸也止於魯東門之外三日滅文仲使國人祭之 不知其名以為神也展禽曰今茲海其有災乎夫廣川之鳥獸恒知避其災是歲也海多大風是爰居之所避 史記呂后紀曰朱虛侯東牟侯率千餘人日晡時擊于呂產走天風大起從官亂莫敢閉遂殺產 京氏易妖占曰

獄吏暴害人臣專政暴風起折木

雜風

黃帝曰凡風若紛錯交橫乍起乍止其聲聒耳君用小人踈遠君子風肅肅習習調和潤氣濡物必雨須臾而至風若暴疾南北無處交錯離合紛埃相注以風之應必在人主未必帝王亦為君父風起冥冥白日沉形黃霧四塞太陽翳精主上昏亂政教不明風若滅滅相隨南北旁亂相觸高下遲疾人去其疾大兵四集 風寒切人戰慄刑罰急酷暴霜殺物 風若啾啾條鳴蕭蕭令人慘悲憂必有大喪疾疫之憂 風氣恍惚交交湯人如火或遲或疾為火為旱戒之所急 師曠曰風起都市之中有羌胡夷應占不必千里外也近事中國人受以羌胡為變亦是也 何以知中國欲攻四夷也四角受角之日時加夜半大風

折木從四季上來五日止此時中國欲攻夷狄也所以然者四季上也畏於木令以角日木剋土故知伐四夷也一云占風大要四季主關梁主津渡主道路關籥主遠方還客何以知水中有大賊諸羽日大風冥迅急水中大賊攻絕關梁不出五日遠五十日何以知水中有大兵且相殺壬戌癸亥乙卯壬辰甲申丁未凡此日有風從申子辰亥上來水中相殺不出五日五十日風止大雨不發何以知水中有大賊且上出攻王侯國常以壬申壬子壬辰壬戌之日有風寒入人飢膚慘慘不解王至賊發疾囚死風至賊發遲連風冥晦四日五日萬民皆悲傷此且有暴水殺人何以知水中有大賊至且出攻王侯國常以壬申壬子壬戌壬辰之日有風從壬子來三日以上日光不明此水中大賊欲攻王侯國其風大寒大兵夜而至不出七

日二十一日遠三十五日王侯之國備之風止有溫而和解不雨謀不解當設備以待之何以知大兵且解散諸商日大風折木從丑寅上來連三日以上至七日此千里萬眾兩軍相當自退解散所以然者商金從徵上來此金出火兵自解散主人勝客軍大敗其將必死近期七日中期二十一日遠期三十五日何以知大火且起也諸角之日有風折木從寅申丑未上來乍疾乍遲時加子夜半此火且宮寺中辰午酉亥四日自處也辰日加辰在部燒二千石傳舍午日加午火燒都亭尉舍酉日加酉燒貴府大傳舍亥日加亥燒喪家牢獄大寒迅急燒殺人溫和但失火期三日風止雨火不發風從甲上來時加庚風比連三日天氣溫和皆為吉令赦書春以甲日風從午來旋風入人宅須臾止庚此都亭小事解半日止者此府吏原罪一

日一夕止者州書原罪三日止者使者原罪四日已上常從甲
 來止庚天子大赦期六十日丁巳之日時加午風從丙上乘止
 亥為贖書期四十五日四季戊己之日時加寅風從寅上來止
 寅為有大赦期六十日時加卯為贖書期四十五日四季之日
 壬時風從辰上來有大赦卯日未上風來有小赦庚申之日時
 加巳風從巳上來止巳為有大赦時加申子為贖書期六十日
 冬壬子之日時加巳未風從壬上來為有大赦時加申為小
 赦期六十日冬至後丙申風從丙上來為有大赦甲申日風
 從壬上來為大贖書壬申為寬大詔書此五申五詔獄日也丁
 巳日風從巳上來有大赦以風起時為期風發時加子賊九十
 人若十一人子數九其若不應辰內月同數者倍之以王相十
 倍之宮日大風從角上來起此兵圍城至日中折木者城必陷

不出九日若十八日羽日大風冥冥日無光沉露設兵圍城

郭客勝主人角日時加子午風從角上來折木兵起必圍城

屯聚主人宜出期九日必至諸四季受商之日大風折木從

四季上來加子午此外界民為屯賊聚往往相攻關梁不通道

路斷絕不出七十日立春正月戊申二月己酉三月庚戌有

暴風從西方來七日不止兵起西方不出衝大起立秋七月

甲寅八月乙卯九月丙辰有暴風從西方來七日不止兵起東

方不出衝大起立冬十月乙巳十一月丙午十二月丁未有

暴風從西方來七日不止兵起南方不出衝大起立夏四月

辛亥五月壬子六月辛丑有暴風從西方來七日不止兵起北

方不出衝大起子日大風日光沉沉沒兵起水中丑日大風

掃地揚沙粟卒貴寅日大風赤氣四塞為火若食物不入卯日

大風黃埃衝天虫螟必生辰日大風眩眩暗暗若將走出巳日
大風傍勃無常必為大旱午日大風乍遲乍疾民不安移堡集
未日大風蕩蕩泊泊日無光景為土功之役申日大風若穀必有
暴貴賤相攻劫酉日風肅肅然潤必有雨水漬流戌日大風
塵霧橫天胡軍四起揚塵數千里亥日大風揚沙折木兵賊相
攻人民啼哭翼氏曰凡行坐有回飄暴風卒起人前而向人
以逆向人勿前從後逐人者若卒起宅內若從外入或揚人衣
物或發人舍皆為凶卒急之事若入北堂為父西堂為母東堂
為長子南堂為孫皆為聚眾在垣為小口在井竈為婦女在門
為長子在客堂為外人在碓磨為奴婢在庭為四隣以五音所
屬知其姓名發時及日辰以別長幼以日剛柔知老少以王相
囚殺知為吏民諸飄回風起而止前者皆以時音期之行

道見回風從西方來必有酒食若加酉酉覆人皆利回就風起
坐席君子失官小人亡財餘倣此辛日風起宮宅中人但持
酒肉來不過三日角日風覆人為疾病從角地為死亡事
徵日回風來覆人為聞訟若徵召徵地來宮中戒火宮日風
起宮宅中為聞訟為田為縣官商日回風來覆人為但失財
亡遺人所謀羽日回風來覆人為但失財物若憂酒肉事聚
人眾千人上漢天文志曰凡候歲善惡謹候歲始或冬至日
產氣始萌日人眾卒歲壹會飲食發陽故歲初正月旦王者歲
首立春四時之始也四時候之冬至臘明日歲旦立春也歲
休立春風從南來大旱西南來小旱西方有兵西北戎菽為胡
豆小雨兵起北方來中歲東北來歲東方來大水南方民疾疫
歲故八風各與其衝對課多勝少久勝亟疾徐旦至食時為麥

至日昃為稷至晡時為黍善下晡為菽至日沒為麻 京房曰
 風從震巽離來主人勝客風從乾坎艮兌坤上來客勝兩軍相
 當風從折衝上來必候敵人資糧風從坤上來有謀不成 風
 為陽雨為陰陽之怒得陰則解故風災得雨則解正月一日朔
 候八風 齊人要術五穀所宜及漢書志 從乾來必有憂兵從坎
 來迴水湯湯有大水從艮來人民疾疫歲有蝗虫從震來即陽
 氣干其歲大早有喪從巽來歲多風傷五穀從離來歲早熟多
 火災從坤來人民疾疫道中死凶從兌來則歲有兵革之事
 宮日風鳴條已上皆為人君出行從德鄉來德事出謂歲月日
 時五行溫和之德為吉情刑鄉來刑鄉事出謂五行歲月日時
 之刑反寒剋冥濁卒起宮宅中皆為土功興作若潰亂出入聚
 眾徵日風鳴條已上來去皆發止於徵者反卒起宮宅中皆為

聚眾會物有寶物出入之事及有水物變船濟之事 商日風

鳴條已上及卒起宮宅中及時商來從商來去皆為宮宅中且

有自傷者及聞死兵傷日辰勝時下皆為外人來傷害主人也

角日風鳴條已上及卒起宮宅中皆為疾疫其時加角來從

角來去皆為外喪法九日有令兵若九十日加王為君長加相

為臣子妻妾加休為下賤 角風申子加角若從角來去皆為

中宮自傷其日辰勝時下皆為外人來害主人也以風起止決

其人所在角中雜羽為溺死雜徵燒死雜商兵死雜宮病死囚

死 京房曰六情者好惡喜怒哀樂 水性智木性靜金性仁火

性躁礼土性力信剛義 一曰貪狼申子辰水之源其性浸淫其

性貪諍水動而盈下晝夜不停向震故申子為貪狼辰為喜水

性智達下流趣末冬藏故貪二曰陰賊亥卯未木之類其性曲

屈其情 伏陰映蔽匿為水所生還賊所養故亥卯未為陰賊
 而未為 木自水生葉落歸本還歸坎方坎主盜賊故主陰賊
 春生故賊 三曰廉貞寅午戌火之位其性貞正其情爰熾精
 耀上井淹濁下降以禮自濟不受穢惡與離同類道合重明故
 寅午戌為廉貞戌為公正火性夏長故正炎強自伏其鄉不盜
 他所故貞正 四曰寬大巳酉丑金之位其性義斷剛直其性
 寬大與乾健同類與兌悅相當有像施與巳酉寬大丑為公正
 金剛義直自歸本城秋收故寬體天故大 五曰姦邪辰未主
 之辰為水窮未為木窮智窮則姦木窮邪曲故辰未主之 六
 曰公正丑戌主之丑金剛而公戌火明而正故丑戌主之 申
 子為貪狼主欺殆不信亡財遇盜求人物強取 巳酉寬大主
 福祿賞賜聚集酒食慶賀喜 亥卯為陰賊主戰聞殺傷謀反

叛逆暴 寅午為廉貞主賓客禮儀嫁娶圖議為人誠信謙近
 主上客遷官 丑戌為公主主報仇諫諍辰未為姦邪主淫泆
 疾疫欺殆

大唐開元占經卷九十二

雨占

候雨

元命包曰陰陽和為雨 河圖帝通紀曰雨者天地之施 釋

名曰雨羽也如鳥羽動則散 稽覽圖曰降陰為雨降陰之雨

潤而不破塊 廣雅曰雨師謂之屏翳 左傳隱公曰凡雨自

三日以往為霖 老子曰驟雨不終日 爾雅曰暴雨謂之凍

今人稱白雨也 尚書洪範休徵曰肅時雨若 董仲舒曰太

平之世雨不破塊潤葉津莖而已陰陽二氣之初蒸也若有若

無若寔若虛團攢聚合其禮稍重乘虛而墜風多則合速故雨

大雨踈風少則合遲故雨細而密 王子年拾遺記曰甘雨濛

濛似露委草木則瀝滴雨也 管子曰春發五教苟得春雨乃

來 曾子曰天地之氣和則為雨 論衡曰道至天者祥風起
甘露降 易候曰凡候雨以朔晦弦望雲漢四塞者皆雨東風
日當 有黑氣如牛彘當暴雨 有黑氣如水牛不出三日大
風 有黑氣如群羊奔如飛鳥五日內必雨 有雲如浮舡皆
為雨 北斗獨有雲不出五日大雨 有蒼黑雲細如櫛袖蔽日月
五日必雨 有雲如兩人提鼓持桴皆為暴雨 四望見青白
雲名曰天塞之雲雨徵也 尚書大傳曰五岳雲皆觸石而出
不崇朝而雨 京房曰諸六甲日有雲氣四合者雷日雨少雲
少雨多雲多雨萬不失一 又一旬中候雨六甲日無雲一旬
無雨 東方朔曰凡諸甲日無雲其旬不雨嘗以甲日平明候
相雨東方者有蒼黑雲甲乙南方有赤雲丙丁日雨西方有白
雲庚辛日雨北方有黑雲壬癸日雨 管輅別傳曰輅過清河

見太守時天旱輅曰今夜當雨是日精無形似見猶未信輅曰
星中已有水氣此必至之應也又天昨檄召五星宣布星府刺
東井命南箕使召雷公雷父風伯雨師群岳亂陰衆川撒精雲
漢岳澤蛟龍合雲天有嘗期道有自然不足為難也見曰若夜
雨者為笑二百斤晝若不雨君留住十日至日向暮了無雲氣
輅言樹上已有少女微風樹間又有陰鳥和鳴而日未入東南
有山雲如樓起黃昏之後雷聲動天到一鼓中星月皆沒風雲
並興玄氣四合大雨河傾 東觀漢紀曰沛獻王輔善京氏
易候永平五年京師少雨上御靈臺自卦以周易林占之其
繇曰蟻封穴房大雨將至上以問輔輔上書曰蹇艮為山坎為
水山雲為雨蟻穴居知雨將至故蟻為興 家語曰齊有一足
之鳥飛集殿前舒翅而跳齊侯大恠之使使聘魯諸諸孔子曰

此鳥名曰商羊昔童兒有屈其一脚振臂而跳且謠曰天將大雨商羊鼓舞今齊有之其應也至急告趣治溝渠脩堤坊將有大水為災頃之大霖雨水溢泛諸國傷害人民唯齊有備不敗景公曰聖人之言信而有徵也史記曰昔夫子嘗行使弟子持雨具已而果雨弟子問夫子何以知之夫子曰詩不云乎月離于畢俾滂沱矣昨暮月不宿畢乎他日又離畢弟子請具蓋笠夫子曰不須弟子問其故夫子曰前者離畢之陰今者離畢之陽東方朔別傳曰漢武帝時日旁有赤雲如冠珥有所持收於是帝召太史待詔王朔問之曰天下恐有兵氣帝更問東方朔朔曰不有大風當有大雨溢渠上曰期在幾日朔曰在二日內居一宿天果大雨暴風帝曰東方先生賢士也賜帛五十疋東方朔曰子日東方四日卯雨丑日東風四日辰雨

寅日東風四日巳雨卯日東風四日午雨辰日東風四日未雨巳日東風四日申雨午日東風即日雨未日東風二日申雨申日東風五日子雨酉日東風五日丑雨戌日東風五日寅雨亥日東風五日辰雨

候雨止

東方朔曰甲子雨丙寅止乙丑雨丁卯止丙寅雨即日止丁卯雨夕止戊辰雨夜半止巳巳雨立止庚午雨辛未止辛未雨戌寅止壬申雨即日止癸酉雨甲戌止甲戌雨即時止乙亥雨即時止丙子雨卒止丁丑雨夕止戊寅雨即時止巳卯雨立止庚辰雨即止辛巳雨癸未止壬午雨即止癸未雨甲申止甲申日雨則止乙酉雨丙戌止丙戌雨夕止丁亥雨即時止戊子雨庚寅止巳丑雨壬辰止庚寅雨即時止壬辰雨辛丑止癸巳雨夕

止甲午雨即時止乙未雨丁酉止丙申雨夕止丁酉雨已亥止
戊戌雨辛丑止已亥雨即時止庚子雨壬辰止辛丑雨壬寅止
壬寅雨即時止癸卯雨即時止甲辰雨即時止乙巳雨丙午止丙午
雨即時止丁未雨即時止戊申雨庚戌止已酉雨辛亥止庚戌雨
即時止辛亥雨癸丑止壬子雨癸丑止癸丑雨即時止甲寅雨
即時止乙卯雨辰時止丙辰雨丁巳止丁巳雨即時止戊午雨
即時止已未雨即時止庚申雨甲子止辛酉雨即時止壬戌雨
即時止癸亥雨即時止 子日雨立止不止寅止丑日雨寅止
不止至卯止寅日雨立止不止卯止卯日雨立止不止巳日止
辰日雨立止不止戌止巳日雨未日止不止申止午日雨立止
不止至十日陰未日雨申止不止戌止申日雨夕止見日不見
日久陰酉日雨立止不止久陰戌日雨立止不止久陰亥日雨

立止不止久陰

霖雨

京房曰八月晦昏而雨繒帛貴人定雨貴人賤賤人貴夜半雨
雨所建寇賊之其下有損嬰兒者必米貴雞鳴雨兵起其事急
未知所走其鄉民人葆徙出走 正月五月九月在丑二月六
月十月在戌三月七月十一月在未四月八月十二月在辰以
此當兩雨所建賊犯之期六十日 又云以雨五子貴人昇而
朝人庶負其子而逃以雨奔命六食三比雨若陰其國亡 壬
戌癸亥日雨以乘甲子旬乃止賤人伐貴者 沛公曰正月上
旬雨卯穀貴一倍中旬雨卯貴十倍 京房曰諸寅卯有小雨
小急大雨大急丙午雨有圍城戊午霖雨三日止其下大戰乙
卯雨早有兵起東方丁卯雨早有兵起南方已卯雨早有兵起

中央辛卯雨早有兵起北方 沛公曰立春日雨傷五禾立秋
日雨害五穀 京房曰春雨甲子六十日旱夏雨甲子四十日
早秋雨甲子四十日水冬雨甲子二十八日大水寒 正月一
日雨一人耕四人治二日雨一人耕二人治四日雨一人種一
人治五日雨天自治 三月一日雨井泉空溝二日雨澤無餘
三日雨水旱不時四日雨變易治五日雨溝瀆滂六日雨壞垣
墻七日雨決堤防八日雨乘舡行九日雨難可期 四月一日
有雨赤地千里二日三日有雨五穀熟 沛公曰五月朔日雨
糴大貴 京房曰七月七日大雨糴倍小雨大賤 八月九日
有雨牛犢一倍九月朔日有雨麻子貴十倍 天鏡曰天雨三
日已上不止陰謀興 道書曰遭洪三雨甲申 繁露曰木有
變則春多雨此徭役衆賦斂重故也 漢五行志曰文帝後三

年大雨晝夜不絕四十五日殺流民家新垣平平謀反之徵也

又成帝時三輔大霖雨四十餘日山谷水出殺四十餘人罷

諸舊祀故也 管子曰冬作土功發地藏則夏多暴雨秋霖不止

續漢書五行志曰靈帝建寧元年夏霖雨六十餘日是時大

將軍何武謀發中宮 魏略曰正始八年雨霖洛陽城往往內

潰輔政者將滅之徵也 京房曰雨鳴凡住城武大臣專擅霖

雨壞道 續漢書五行志曰桓帝延嘉二年夏霖雨五十餘日

是時大將梁冀秉政謀害上所幸鄧貴人母宣冀又擅殺議郎

邴遵上欲誅冀惧其持權日久威勢強大恐有逆命其年八月

冀伏誅滅 又建元元年京都及郡國二十九日淫雨傷稼是

時羌反未平百姓屯戍不解愁苦 京房曰季冬小雨流血衆

大雨大流血 十一月雨水橫流者天下人民飢 冬雨水君

死國亡 抱朴子曰軍始發大風甚雨起於後大勝之徵也軍始出雨霑衣裳者是謂潤兵軍有功雨不足沾衣裳是泣軍必敗

無雲而雨

感精符曰夫失陽事則無雲而雨宋均曰四月純陽用事失陽無雲而雨 河圖曰主急恚怒則無雲而雨 抱朴子曰無雲而雨是謂雨血將軍當揚兵講武以應之雨大軍中尤甚將軍戰必無功 京房曰人君封拜無功進用無德則致不雲而暴雨

密雲不雨

京房對災異曰過咎暴揚諫反受罪則密雲而不雨其救也誅強恤弱信及兆民則雲雨時 易曰密雲不雨自我西郊謂政

失之所致也 易侯曰密雲不雨茲謂休德西伯始子六氣不足

偏雨

京房對災異曰人君擅私恩恣意縱情不與臣下同謀即致偏雨墮也不救致苦雨降萬民愁勞水絕道其救也與公直無私黨此變消矣

當雨不雨

京房曰二月七日至八日當雨不雨九月道中有餓死人九日至十五日丁丑不雨兵起十七日十八日不雨蟄虫冬行十九日至二十日不雨三月大旱二十六日至二十八日不雨大逆風從東方來三十日不雨太白逆行十三度 三月一日至三日當雨不雨秋日大霧道中有飢死人七日不雨客星守天倉

有兵起米穀貴斗四百九日至十五日不雨兵罷十八日至二十日不雨角虫死天下民人恐二十三日不雨至二十七日不雨蟄虫冬行走在道中民人多疾病四月四日至七日當雨不雨蟄虫冬行民人自恐不安其處十一日至十四日不雨其歲惡十八日不雨大旱冬温二十一日不雨有兵起在東北來千里三十日不雨必有風起五月四日至七日當雨不雨大旱禾虫十一日至十七日不雨西方千里外多病二十日不雨樹木枯死二十三日不雨乳母病疾二十六日不雨大旱風雪至秋九月遭雨二十九日三十日不雨大暑熱六月三日四日六日當雨不雨角虫多死七日至二十日不雨應霧起牛貴二十日至二十二日不雨下田水人少食二十三日二十四日不雨十月合凍二十七日不雨下田水人少食七月二十二日

當雨不雨大水二十三日二十四日不雨大風二十五日不雨有兵起外國八月一日當雨不雨必大風雷二日至五日不雨秋霜人民疾病人日至十五日不雨大風寒十九日不雨人民多妖言二十一日不雨大霧牛貴二倍二十六日不雨冬有大雷九月一日當雨不雨必有霜天下人民棄妻子十二日不雨人民多有死者二十七日不雨天下多恐十月三日當雨不雨兵起西北方七日至十日不雨決水逆流十三日至十五日不雨大風寒十九日不雨小兒多疾病二十五日不雨冬温不合凍連年多病十一月四日當雨不雨大旱八日至十一日不雨乳母多疾死十六日不雨人民不安其處二十二日不雨江河決魚行人道二十九日不雨人民多死亡貧者復富富者更貧十二月四日至六日當雨不雨大旱九日至十三日

日不雨大霧二十日不雨有角虫盜賊二十七日不雨大風雷
八節占曰二分多風雲二至多陰雨皆前後三日為候冬陰
夏雨春風秋雲

早祈降雨

師曠占曰歲欲旱旱草先生旱草者蒺梨也 黃帝占曰日中
三足烏見者大旱赤地 東方朔傳頌旱曰維昊天之大旱失
精和之正理 晏子春秋曰齊大旱景公召群臣問曰天下不
雨久矣民皆有飢色吾使人卜之崇在高山廣澤寡人欲少賦
斂以祠靈山可乎群臣皆莫能對者晏子進曰不可祠此亦何
補也夫靈山固以石為身以草木為毛髮天久不雨髮將焦身
將熱彼獨不欲雨乎祠之何補河伯以水為國以魚鱉為民天
久旱不雨水泉欲下百川將竭國將亡民欲滅矣彼獨不欲雨

乎祠之何補景公曰今為之奈何晏子曰君誠心避宮殿曝露
與山河共憂其幸而雨景公即出曝露亡日天果大雨 周禮
春官司巫曰司巫掌群巫之政令若國大旱則率巫而舞雩
續漢書曰永元六年張奮代劉方為司空時歲旱災祈雨無應
乃上表即時引見後口陳時政之宜明日和帝召太尉司徒幸
洛陽則大雨三日 東觀漢紀曰和帝鄧后永初三年三月京
師旱至五月朔太后幸洛陽寺省庶獄舉冤囚放枉罪左遷
行未還宮澍雨降 又和帝永元六年秋京都旱時洛陽有冤
囚和帝幸洛陽寺錄囚徒理冤囚放令下獄枉罪幸未還宮澍
雨降 後魏書曰孝文帝大和二年京師旱祈天文於北苑親
自禮焉減膳避正殿澍雨 大治三年帝祈雨於北苑閉陽門
是日澍雨 莊子曰昔宋景公時大旱三年卜之以人祀乃雨

公當頓首曰吾所以求雨者為吾民也今必使以人祠寡人將
自當之言未卒而天大雨方千里淮南子曰湯時九年旱以
身禱桑林之際而四海之雨湊千里之雨至前燕錄曰建熙
七年五月慕容暉下書曰朕以寡德蒞政多違亢陽之時陰先
錯令農殖之辰零雨莫降其令有司徹樂懸太官以菜食供祭
酒澍雨大降

大唐開元占經卷第九十二

大唐開元占經卷第九十三

元日祥瑞

史記天官書曰謹候歲始之日產氣始萌陽氣發動正朝王者
歲首立春日四時之始四時者春為首陽氣清而溫夏為朱明
氣赤而光明秋為白藏氣曰而收成冬為玄冥氣黑而清冥四
氣和謂之玉燭玉燭者首光明也春為發生夏為長羸秋為
收成冬為安寧甘氏曰歲旦佳氣四塞歲美民和人君吉昌
庶事咸寧瑞應圖曰正月一日天氣清明萬方清謐人主壽
昌天下太平五穀成熟漢天文志曰正月一日有風從東北
來為上歲其年大豐黃帝占曰歲旦天氣清和而溫潤風不
鳴條兼有雲迎送日其歲大美人無疾疫石氏曰黃氣在上
下為人主有喜含文嘉曰君致尊而制命則日月貞明洪

傳曰明王踐位群賢履職天下和平黎庶康寧日麗其精明揚其景耀 王充論衡曰王者道至於天則日揚大光 石氏占曰君不假臣下之權則日揚大光 京房易傳曰日揚大光天下和平上下俱昌延年益壽與代無極 石氏曰黃氣扶日輔臣納忠 瑞應圖曰立春南方有和氣風至主生養萬物 黃帝占曰調長和緩謂之祥風 帝命驗曰德至于天則祥風起 都萌占曰正月朔日曉至三日無風雨陰不見日者一歲大美十倍

八節氣候

神農曰夫立春日者一歲之元首主君位欲清明而潤微有風氣從艮而來盡一日者天下和五穀俱成君慈被四方臣盡忠智若大陰風發屋折木揚沙走石則下凌上國土不安 感精

符曰謹秋冬至之日見雲送迎日來歲美人民和不疾疫無雲送迎德薄歲惡雲赤旱白雲兵雲黃土功雲黑有水諸從日氣迎送以其徵也 宋均注曰冬至日雲送迎者迎日出而送日入也 京房曰冬至之日坎卦用事夜半必候北方有青雲人民無疾疫天必應之小豆賤離風來五月水後旱坎風來人疫大豆不成飢坤風來小傷水人民虐病艮風來其年木貴一倍 黃帝占曰立春之日東北條風至宜大豆德氣至此和政應若有清潤調和之風從艮上來者歲中大善微微而雲見日者亦善大雲闇翳者立秋大旱若病風從西南來東方來其歲必有疾疫穀貴在四十五日中謹候雞鳴時東北有青黑雲者其歲必美 春分之日候日出平明時正東方有青雲宜大麥習習谷風從東而來年中大美風大極疾王失政秋西方兵起其

有疾風從西方來麻必貴在四十五日中 立夏之日日禺中
時候東南有雲如雞微風發宜小麥若風從東南來宜早麻即
西北風者秋氣生稻必在四十五日中 夏至之日日中時候
南方有赤雲若有疾風者宜黍稷若風從西北來者北戎起毒
其小豆穀貴在四十五日中 立秋之日日昃時候西南有黃
雲如牛宜未天必應之若風東北來東北夷動大豆貴在四
十五日中 秋分之日日入時候西方有白雲如群羊宜稻天
必應之大風若風雨從東來者大麥及穀在四十五日中 立
冬之日人定時候西北方有白雲如龍馬狀天必應之即寒風
從西北來宜稻人無疾疫五穀成即逆時風溫皆不利老人死
一曰役之一曰有陰雨者風從東南來小麥貴在四十五日中
冬至之日夜半時候北方有青黑雲人民無疾疫天必應之

小豆賤水當堅堅者利老人又曰冰不堅者 老者汪汪 正

月立春之日明有疾風折木發屋絲貴其歲大凶 立春之日

天氣清明則旱傷黍少寔有白雲順風則年豐大樂風從艮來
氣泄萬物不成風從坤來春多寒六月水人多憂苦憂土功事
風從震來為順五穀皆熟風從兌來早霜傷物歲有大風風從
巽來歲多風必小豆生風從乾來霜殺物五月粟貴風從離來
年旱傷殺物風從坎來冬大寒北秋內之 春分之日天氣清
明萬物不成東方有聚青雲則善為順風逆則無賤震風來為
順五穀必登兌風來春多寒人憂兵巽風來虫生四月多暴風
來年歲多寒金錢貴離風來五月水後旱坎風來人疫大豆不
成飢坤風來年小傷水人民多虐病艮風來其年米貴一倍
立夏之日天氣清明必早禾種少入東南有黑雲為順其年豐

乾上風來人飢夏霜麥不收金器貴離上風來夏旱禾焦坎上
風來魚行人道坤上風來人不安萬物夭傷艮上風來山泉湧
地動人疫兌上風來必蝗虫人驚動震上風來雷電非時而擊
物巽上風來其年善 夏至之日天氣清明南方有赤雲其年
豐風從坎上來夏多寒離風來寒暑不時艮上風來山泉水暴
出坤上風來六月多水橫流人道兌上風來秋冬霧雨震風上
來八月人多病疾乾上風來寒傷萬物巽上風來九月風落物
立秋之日天氣清明萬物不成若有小雨則吉年善風從東
來則秋多溫疫草不更榮坤上風來五穀豐年美艮上風來逆
氣不和兌上風來秋八月穀貴震上風來秋雨雹人不和巽上
風來卒有動于內離上風來多旱乾上風來寒甚坎上風來冬
陰多雪 秋分之日天氣清明萬物更生小雨則善西方有白

雲為和卯上風來溫物不寔兌上風來來年安樂乾上風來人
多相掠為賊巽上風來十月多風震上風來為逆人疫再荒坎
上風來冬傷於寒艮上風來十二月久陰離上風來人動日南
坤上風來土功作老婦行採拾 立冬之日天氣清和人君善
小寒順風天下喜風從東來則冬雷乾上風來人不安政教行
巽上風來必逆冬溫來年夏旱坎上風來冬雪大殺走獸離上
風來來年五月人疫病艮上風來地氣泄人多疫坤上風來水
虫食物魚益倍貴震上風來人民不安居兌上風來賊寇於山
澤 冬至之日天氣清明萬物不成風雨寒則來年豐人安離
上風來乳婦多死又曰水旱不時冬溫人疫坎上風來來年人
樂艮上風來正月多陰坤上風來虫生傷苗來年人不安其處
震上風來雷不發而併兌上風來秋雨大恐巽上風來來年虫

生傷物乾上風來強國年多寒也 易通卦驗曰冬至陽雲出
箕如大樹之狀立春青陽雲出房如積水春分正陽雲出張如
積白鶴立夏常陽雲出觜赤如珠夏至少陰雲如水波葦葦立
秋濁陰雲如赤繒秋分白陰雲出立冬陰雲出凡冬至日謹候
此八節雲氣見雲送迎從其鄉來歲美民和 鄭玄曰二至二
分觀雲色青為虫白為喪赤為兵黑為水黃為豐 甘氏曰春
分王日有氣如虎守日如日食之狀臣弑主夏至王日有黑氣
如虎守日臣殺主秋分王五日有赤氣如朱雀四方守日臣弑
主冬至王日有黃氣四方守日臣弑主諸土王日有青雲氣如
龍在日右臣弑主

七十二候當候不候

易演曰東風解凍不解凍時令不從 蟄虫出振不振民保城

郭 魚上負冰不負冰則臣下專政 獺祭魚不祭魚國多盜

賊 鴻雁歸不歸遠人不服 始雨水不雨水雷風不節 桃

始華不華倉厨多火災 鷓鴣鳴不鳴偽言將起 鷹化為鳩

不化為鳩盜賊不理 玄鳥至不至則天子大人易紀 雷始

發聲不發則王威不行涌水出 電始見不見房室亂紀而陰

久雨 蟄虫咸動不動君臣上下不理 蟄虫開戶始出不出

民不布田野 桐始華不華天多沉陰 田鼠化為鴽不化鴽

事起 虹始見不見女謁亂公 萍始生不生水物夭傷 戴

勝降于桑不降盜賊不理 螻蟴鳴不鳴來年大凶多水 蚯蚓

蚓出不出道路不通 王瓜生不生則忠諫臣傷 苦菜秀不秀

則道術潛藏 靡草死不死則臣下不良草木不成 小暑至

不至涌水妄出 螳螂生不生姦回事發 鷓始鳴不鳴號令

隔絕反舌無聲有聲諫士貶出 鹿角解不解貴臣作姦
 蟬始鳴不鳴國多妖言 半夏生不生萬物虛耗 木槿榮堯
 蟀居壁不居戶閤不通 鷹乃學習不習衆雞夜鳴兵動 腐
 草化為螢不化臣作姦 土潤溽暑不溽暑田疇不保物不成
 涼風至不至國有旱流星為災 白露降不降民病瘡疽多
 温病寒蟬鳴不鳴童民作歌謠 鷹祭鳥不祭爵位無常
 天地始肅不肅王威不行物不成 暴風至不至刑人從釋之
 鴻雁來不來遠人不服為賊 玄鳥歸不歸萬人徙散移境
 封 群鳥養羞不羞國失容服 雷收聲不收王威不行傷善
 人 蟄虫附户不附人離畿 殺氣侵上不侵上草木生榮不
 寔 陽氣始衰不衰穀寔毀傷 水始涸不涸涌水為災降霜
 失度 鴻雁來賓不賓邊陲叛逆外屬也 雀入大水化為蛤

不化民多淫泆 菊有黃華不花土不稼穡 豺祭獸不祭國多
 盜賊 水始冰不冰炎旱為災 地始凍不凍民不安舍宅
 野雞入水化為蜃不化多淫邪 虹藏不見不藏房室亂紀
 冰益壯不壯雷將冬行 地始坼不坼民多流亡 鶡鴒鳴不
 鳴偽言將起 虎始交不交后妃失政逆 芸始生不生君令
 不行多暴風 荔挺出不出民人疾病國多火災 蚯蚓結不
 結民多病 麋角解不解臣下專職夏有電 水泉動不動君
 失威道路不通 鴈北嚮不嚮邊境外降 鵲始巢不巢春風
 暴至 雉始雊不雊春雷不發 雞始乳不乳蟄虫不降

大唐開元占經卷第九十三

大唐開元占經卷第九十四

雜雲氣占

帝王雲氣

歸藏啓筮曰太昊其受天之藏衆龍脩從有白雲出自蒼梧入于大梁 漢郊祀志曰武帝封禪夜有光晝有白雲起封中 魏志曰文皇帝以漢中平四年十二月癸亥生于沛國譙郡 上有青雲如車蓋 孔演圖曰黃帝之將興黃雲升堂于陽白雲入房 洛書蒼帝起青雲扶日赤帝起赤雲扶日白帝起白雲扶日黑帝起黑雲扶日黃帝起黃雲扶日 漢武故事曰宣帝祠甘泉頃紫雲從西北來散於殿前 又上近洛陽至甘泉宮有黃雲蓋其上車類 秦書曰符堅時有黃雲五色時以為瑞賜民酺五日 坤靈圖曰玄雲入戶蛟龍守門謂慶都也赤

龍感動使有合誠圖曰堯母慶都蓋火帝之女主於外淮之野
常在三河東南天大電有血流潤大石之中生慶都長大形象
火帝有黃雲覆蓋之夢食不飢年二十寄伊長孺家無夫出觀
三河奄然陰風赤龍與慶都合有娠生堯 漢武故事曰帝上
梁父祠地主上親拜用樂焉其日山上有白雲又有呼萬歲者
禪肅然曰雲為蓋 兵書曰凡天氣內赤外黃正四方所發之
處當有王者若天子欲有遊往之處其地亦先發此氣 天子
氣如城門隱隱在氣霧中恒帶殺氣森然 天子氣如華蓋
在氣霧中或有五色又多在晨昏見 天子氣如萬石倉在氣
霧中 天子氣如高樓在氣霧中 天子氣五色如山鎮 洛
書曰有氣象人青衣垂乎在日天子之氣 范增曰漢祖氣皆
為龍獸感五色此天子氣也 項羽在鴻門亞父謀曰吾使人

望沛公其氣衝天五色采相糝或侶龍或侶虎或侶人此非人
臣之氣不若殺之范增曰氣如龜鳳大人有五綵其形隨王時
發者皆天子之氣皆多上達於天 尚書中候曰堯沉璧于河
滎光出河休氣四塞 洛書曰蒼帝氣如人向日如拳手而俛
頭一手在後赤帝氣象火光如覆蓐狀立在日下黃帝氣象如
青馬在日下白帝氣象如大虎在日下黑帝氣象如舟舡在日
下 王隱晉書曰咸寧元年洛陽大社中有青氣占者以為東
方後當有天子氣出東見故改為瑯琊河東之應也 魏書曰
文帝母生齊郡白亭有黃氣滿室移日文敬侯恠之以問卜者
王旦旦曰此吉祥 應邵漢官儀曰世祖封禪夕有白氣廣一
丈東南極望正直壇所有青氣上與天屬遙望不見真瑞命之
符也 漢武故事曰上巡狩過河間見紫青氣自地屬天望氣

者以為下有奇女求之得拳夫人

慶雲

瑞應圖曰慶雲赤紫色如烟非烟若雲非雲郁郁紛紛蕭索輪
菌是謂慶雲見喜氣也亦曰景雲 非氣非烟五色氤氲名曰
卿雲太平之應也 雲含五色潤澤和緩見于城上景雲也
尚書大傳曰於時俊乂曰百工相和而歌卿雲注云卿當為慶
也據時之有故美之美以為歌帝之篇

雜雲氣

易說卦曰坎為雲 河圖帝通紀曰雲者天地之本也 元命
包曰陰陽聚為雲 雷公式經曰雲師字彭亨 易候曰視四
方當有大雲五色具者其下隱賢人也 郝萌曰雲氣如三疋
帛廣前銳後大軍行氣也 兵書曰韓雲如布趙雲如牛楚雲

如日宋雲如車魯雲如馬衛雲如火周雲如車輪秦雲如行人

魏雲如龜齊雲如緋衣越雲如龍蜀雲如菌陳雲如垣掃雲如

頻梯軸雲如搏雨端銳 東方朔傳曰凡占長吏農耕當視天

有黃雲來覆車五穀大熟青雲致兵白雲致盜烏雲多水赤雲

有火 呂氏春秋曰山雲草莽水雲魚龍旱雲烟水雨雲水波

魏武兵書曰雲氣非雲非烟非塵非晦非蒙形侶禽獸客吉主

人忌之 甘氏日常以九月上丙候日旁有交雲其下有兵

易林曰白雲如舞往往其處飛風送迎大雪將下 東觀漢紀

曰二公圍昆陽正晝有雲直營而殞不及地而散吏皆壓伏

感精符曰謹候冬至白晝見黑雲有水雲赤白如人頭懸鏡之

狀禍流 易妖占曰如星非星如雲非雲或星有如兩彗向上
有蓋下連星名曰歸邪 音蛇 見則有歸國者 五行傳曰雲者

起於山弥於天雲陰也王者失忠臣下盛蔽君明雲陰衆多而蔽天光也有雲如衆風是謂風師法有大兵 運斗樞曰勢奪於后族群妃之黨潛黃雲四合女訛驚邦 感精符曰妻黨翔則黃雲入國 潜潭巴曰雲氣沐沐不濁賢人去位小人祿左傳曰哀公曰楚子平于城父是歲也有雲如衆赤鳥夾日以飛三日楚子使問諸太史曰其當主身乎 趙書曰石虎建武中東南卒有黃黑雲稍分為三如疋布貫日日沒後分為七每翔去數十丈其間有白雲如魚鱗虎子韜曰當有刺客後果為太子宜所殺 呂氏春秋曰亂國之主衆邪所積其雲狀有若衆車 郝萌曰雲如一疋布而行若西若東若南若北邑都上者其君有憂 京房曰必其晴以去四望無雲獨見赤雲如立虹其下有流血出戰 郝萌曰四望無雲獨見赤雲如覆甍者

者其下有戰 易飛候曰壬子日候四望無雲獨見赤雲如旗旗其下有兵起若過四方者天下盡有兵 京房曰若四望無雲獨見黑雲極天兵大起半天兵半起三日內有雨災解 四望無雲獨見赤雲如火其下流血戰死 荊州占曰天有白雲廣六丈東西竟天者有大喪 京房曰有雲如疋布竟天兵起 郝萌曰有雲如相揖兵起民流有雲如狗四五枚相聚國兵起 帝覽嬉曰四方清除獨有雲赫然者所見之地兵起 荊州占曰有雲如鷓尾來陰國上三日亡 有雲如日月暈赤色其國亡 有雲如日月暈青白色有大水 有雲如龍形行國大水民流亡 京房曰有雲赤黃色四塞終日見夜照地赤黃者大臣縱恣 郝萌曰有雲如氣味而濁賢人去小人在位 雲甚潤而厚大雨必暴至 若黑雲黑氣南北陣國將有憂不

然有大水為害 京房曰雲氣如亂穰大風將至視所從來避之 易雲氣占曰四始之日有黑雲氣如陣厚重大者多雨 京房曰白雲白氣極天南北陣軍有憂 郝萌曰有黑雲東西陣軍欲有憂若天氣蒼茫而東西極天移日不動者為憂深此氣以戊己日為害 赤雲臨國上東西陣國且負兵 兵書曰有雲如立人五枚或如三牛邊城圍 禮記曰天地嚴凝之氣始于西南而盛于西北此天地嚴尊之氣也天地之義氣也天地溫厚之氣始於東北而盛於東南此天地之至德氣也此天地之仁氣也 周書時訓曰小雪後五日天氣上騰地氣下降 北燕錄曰玄始十一年春正月饗群臣于謙光前殿沮渠蒙遜曰南方有惡氣經天暴兵眾也不過一旬必有寇因命治兵東苑以備之西秦遣騎七千乘至孤候嶺聞有備而還 呂氏春秋

曰亂國之主其氣有豐上殺下有若木之皮有若山之木春黃夏黑秋蒼冬赤 三輔舊事曰漢作靈臺以四孟之月登臺而觀黃氣為疾病赤氣為兵黑氣為水 漢天文志曰成帝元始二年二月癸未夜東方有雲赤白色大三四圍長二三丈索索如樹南方有大四五圍下行十餘丈皆不至于地滅占曰東客之變氣狀如樹木以此知西方欲動者明年十二月己卯尉氏男子焚並等謀反 郝萌曰赤氣如火影見者臣叛其君不過三朔 京房曰赤氣如龍蛇在山頭住又如夜光者臣離其君國主不安為客君所傷土地不安人民流移遠其鄉里 郝萌曰黑雲如大道一條至四正五明不見頭尾東西者不過三朔大赦天下 黑氣如群羊如猪如魚為六夷不順 兵書曰天有白氣狀如疋布經丑未天下多兵赤者尤甚

雲氣貫日及有日旁兼日瑕

夏氏占曰日上下有黃氣皆為君有喜 高宗占曰有黃氣溫
 溫人主房中有喜 京房易候曰青雲潤澤蔽日在西北為舉
 賢良 郝萌曰日出沒時有雲橫截之白者喪烏者驚三日內
 雨者咎解 夏氏占曰日旁有赤雲兩端銳有戰國人死其下
 甘氏占曰雲赤如虹與日俱出其所臨國有大憂 左傳哀
 公六年有雲如衆赤鳥挾日以飛三日楚子使問諸周太史曰
 其當王身乎若榮之可移於令尹司馬王曰除腹心之疾而冥
 諸股肱何益不穀不有大過天其夭諸有罪受罰又烏移之
 高宗占曰雲如赤烏三喙日兵起大飢 甘氏曰日旁有赤雲
 如懸鏡之狀其下有死將期二十日狀如曲輪向日不出二年
 臣背其主二者在日東皆為東方在日西為西四方皆然 京房

易曰有赤雲如兔以屬日當國賊死 日入有青氣東西極天
 支干數內無氣風雨不出三年將有大喪 甘氏曰日中如竿
 有雲在日旁四陣如軍將戰當其國者其國閉 高宗占曰日
 下莫莫如氣其中如馬車馳狀將有反者被甲而起 京房易
 曰雲氣如車牛相隨居日旁大水 甘氏曰有爵雲行日旁者
 爵祿喜 日下如伏虎臣弑君子弑父敬欺脫君之政國城不
 屠兩敵相當敵人有伏兵大強 赤氣直日者宮中有聞王亡
 也 日有白雲廣二尺在日東西其國有憂兵將起 日上有
 黑氣如蛟龍狀為風雨 日已出若日入而雲皆赤黃不出三
 年必有移民 日四方五色雲皆新見其下國謀臣不安其主
 日中有黑氣君有小過而臣不諫又掩君惡揚君善故日中
 有黑氣不明是 感精符曰虎喙日大將反 高宗占曰有氣

如禽獸戰皆然 日下有赤氣如死蛇大飢疾疫 日有赤氣如箭外向三月出軍內向如冬株使至言軍事又曰赤氣如冬株在日旁兵起客勝主人 日有赤氣狀如博局小臣謀其主期一年日氣赤如人有所持若如人牽日皆為臣欲反 夏氏曰青氣在日上下吉可出軍 青鳥守日司徒為無道 虎守日天子貪 天牛守日國發兵 天馬守日詔車騎多賊傷萬民 青龍守日臣謀上 甘氏曰日未出有赤雲見日上君有佞臣 日旁有赤氣大如帶者萬民死其下蒼雲四扶日者臣欲謀主天子內分期不出三年 洛書曰有氣如斧在日西君慢以無禮見患則此氣見 論衡曰陳留虞延字君大夜生有氣貫其上如一疋縮經上天以問人人曰吉氣與天通後仕至司徒 考異郵曰其城有天子之氣如人形積土壯立於日旁

各以其色占其下有聖主而出者天子慎之往厭其處因行古帝之治不然無諱其戒 洛書曰有氣象兩青鳥向日下人主恣逆天暴物則天禍起 尚書金匱曰日瑕者始出若日入有雲隔之白者為喪赤者為兵黃者為土功黑者為戮王其救也 關四門求仁賢授官分職脩名責實

雲氣出宮廟

京房易妖占曰天無雲雲自出廟日有兵邑且有水如帝如馬其下有兵 蜀季書曰哀帝即位有白氣二道帶天望氣者言宮中有伏兵果為邛都公所害 後魏書曰莊帝永安二年十一月己丑有赤氣如霧從顯陽殿西南角叙屬步廊高一丈許連地如絳紗慢自未至戍不滅帝見而惡之終幽崩之禍

大唐開元占經卷第九十四

大 唐 開 元 占 經 卷 第 九 十 五

雲氣犯二十八宿占

雲氣犯東方七宿

雲氣犯角一

郝萌曰蒼氣直入兩角間天子用疾祠 蒼黑氣入右角兵偏
敗出 右角戰有憂黑氣出右角戰不勝以水敗白若赤氣入

右角兵出出右角國兵驚戰不勝 赤氣入右角而波揚

者以火敗者燒也 赤氣入右角如行者行道遠將有奔命之

事 赤氣從北斗直過兩角間迴者有過兵 荊州曰赤氣從兩

角過入亢有過兵白有過客黑有過喪 郝萌曰黃氣直入兩

角間天子祠神 黃白氣潤澤入右角得地 有氣起如劍刃

經兩角間三十日連三日人主無下殿無出宮廊廟有伏陣兵

有雲以正月二日五月八日十一月十四日在天門中邦家不通

雲氣犯亢二

郗萌曰青氣出氏入亢王有病帶以下 蒼氣入廷人民病疫

黑氣入廷有水憂一日使諸侯言口令事 赤氣入亢徑出廊

廟間有陣兵 赤氣入亢中有處兵赤而波揚者火之憂 赤

氣出亢中國疫疾亡 黃白氣潤澤入亢有治廷事

雲氣犯氏三

郗萌曰黑氣入氏大水 赤氣入氏及亢徑出廊廟間有陣兵

赤氣守氏有兵 黃白氣入氏有土功事 黃蒼白氣入氏

大疫 黑氣入氏房間使諸侯言口令之事

雲氣犯房四

郗萌曰黑氣出房宮中憂 黑氣貫兩角間入房之亢諸侯有

使來者言口令之事若有水 虹雲與月俱出房心間諸侯王

死期三年 雜雲氣占白氣如大道透地曲入房還入漢宮兵

水大降國王流移人民大動飢死道傍嫁妻賣子尸骸棄不見

收藏却後不過二年帝王崩婦人庸客不還 郗萌曰赤氣入

房宮中有亂臣兵起又曰入房氣波揚宮燒出房起兵 赤黃

氣入房潤澤國寶有入者氣出寶有出者 有氣正經兩角間

入房閉門閉再經之而信三經之而成兵

雲氣犯心五

郗萌曰青氣出心天子使人使諸侯 黑氣入心左星太子有

罪 白氣入心亂臣居旁兵起 赤氣入心有立王出心有兵

赤氣出心以南天子左右有亡者赤氣芒銳正刺心星大人

憂 赤黃氣出心王就國 黃氣入心天子有子孫喜 黃白氣入心左星太子受賜 黃白氣潤澤如一疋布正抵心下諸侯有來附兵於我君者 氣起當如一筵狀赤如雞頭血入心天子遇賊其氣出心也行道遠天子斬伐百姓千里之外大將亡

雲氣犯尾六

郝萌曰蒼氣入尾君故臣有來歸者 蒼氣若黑出尾臣有亡者 黑氣入王侯客有來歸骸骨者 白氣入尾君故臣有來歸者 赤黃氣入尾諸侯王客有來使兵事 赤黑若黃氣出尾君往使諸侯亦用兵事 赤氣出尾有兵 有氣出尾臣有死者

雲氣犯箕七

郝萌曰蒼白氣出箕國灾除 黃白氣出箕天子有使者出以美厚容色黑死不至 黃氣入箕有美女喜色蒼為風所覆色黑死亡不至 黃白氣入箕蠻夷客來見者

雲氣犯北方七宿

雲氣犯南斗一

郝萌曰蒼白氣入南斗多大風 赤氣入南斗兵起波揚宮廟有火之灾憂大旱 赤氣出入南斗兵從之 雜雲氣占赤氣入北斗還勾南斗不過一年下有血流兵將死營空塢沒客勝主人 黃白氣出南斗天子使諸侯 黃白氣潤澤入南斗四方諸侯客來見天子者 黑氣入南斗廟有大憂

雲氣犯牽牛二

甘氏曰虹雲出牽牛之度必有壞城期二年 郝萌曰蒼白氣

入牽牛牛多疫 黑氣入牽牛牛多死
赤氣兵起出牽牛兵出 又曰黃氣入牽牛牛畜息 黃白氣
入牽牛諸侯有四足虫為幣者 黃白氣出牽牛天子以四足
虫為幣賜諸侯

雲氣犯須女三

郝萌曰黑氣入須女多婦人喪 白氣入須女女多疫者 陳
卓曰赤氣入須女人多乳死 郝萌曰黃白氣入須女有娶婦
之事若出須女有嫁女之事

雲氣犯虛四

郝萌曰蒼氣入虛哭泣出虛禍除 黑氣入虛廟有水之憂一
曰廟崩壞 白氣入虛有無幣客來者
白氣出虛天子無幣之客出 赤氣入虛有兵在廟中出虛兵

在廟外 陳卓曰赤氣入虛有火之憂

郝萌曰黃白氣入虛天子喜起廟出虛此享氣也 又曰雲氣若
立虹守虛人民大虛天下火起

雲氣犯危五

郝萌曰蒼氣入危國憂損屋 蒼白氣若赤黃氣入危有盖屋
之事 黑氣入危有水之憂出危禍除

荊州占曰黑氣出危中北鄉大水有流亡東鄉國君死之百草不
寶西鄉人主憂死南鄉有疾疫期明年若不出其年 郝萌曰
黑氣入危中北鄉大水西鄉其君死東鄉粟不寶南鄉有兵皆
不出一年 赤氣入危宮中有兵之憂若出危以火發屋 黃
白氣出危發屋之事

雲氣犯營室六

郝萌曰蒼白氣入西壁大人有喪憂 黑氣入營室大人憂亡國 赤氣入營室兵入國 雜雲氣占赤氣如大道來在營室上者為君主無下宮室營陣中君國中暴病連尸交橫逆臣用事不過三年其土大飢 黃氣入營室土功事一日義事 白氣潤澤入營室中諸侯王客有來使者廟將之事也 黃白氣出營室中天子之使使諸侯王皆言廟將事有氣潤澤如日月入營室男子之祥 黃白氣從東壁入西壁天子有喜

雲氣犯東壁七

陳卓曰蒼白氣入東壁大人有喪之憂 陳卓曰黑氣入東壁有破國之王 郝萌曰赤氣從西壁入東壁是兵氣也天子自手殺其臣氣波揚有大憂臣有燒死者 陳卓曰赤氣入東壁有兵 黃氣入東西壁天子有喜列土立王

雲氣犯西方七宿

雲氣犯奎一

郝萌曰青白氣出奎有兵 黑蒼白赤氣出奎皆為禍除 蒼白氣入奎婦人有喪憂 蒼赤氣入奎無所使受命來者出為出者 黑氣入奎又直貫奎三犯不去大人憂 赤氣迥入奎婦人多血疾 赤氣入奎有兵 黃氣潤澤入奎天子有美女喜 黃氣中奎有珠玉寶喜

雲氣犯婁二

郝萌曰黑氣入婁有水之會 黑氣出婁入廟其氣重重如轉蓬始至大人食藥死一曰水將大至 黑氣正中廟星有赤氣如劍鋒環人有藥死者 赤青白氣入婁中有兵君有疾之憂 出婁禍除 黃氣入婁人民受賜

雲氣犯胃三

黃帝曰赤氣出胃以兵出粟 郝萌曰青氣黑氣出胃有兵
黃帝曰黃氣出胃天子賑民 有氣出胃色蒼白以喪出粟赤
以兵黃以天子民蕃 郝萌曰氣童童如轉蓬出胃大人食藥
死一曰水將大至
黃白氣潤澤入胃歲中大人入國倉實 黑氣入胃則倉困敗
谷腐

雲氣犯昴四

郝萌曰青黑氣出昴有兵一曰大水 蒼白氣入昴民多喪憂
出昴其禍除 赤氣入昴天子白衣將兵民聚鼓下出昴軍在
野居 黃白氣潤澤入昴中天子白衣會出昴白衣罷 春秋
緯曰昴有珥彌國名息

雲氣犯畢五

郝萌曰蒼白氣入畢歲不收出畢其禍除 蒼白氣入附耳將
死 赤氣入畢兵起波揚火起不然大旱 赤氣入附耳兵內
起出附耳中將出 黃白氣入畢中其歲大人必有生者天子
有喜出畢天子田饗民 黃白氣入附耳星中安和無兵出
附耳中乃立將

雲氣犯觜六

郝萌曰蒼白氣入觜觶天子有葆旅之事出觜其禍除 赤氣
入觜中兵起 黑氣入觜觶大人憂 赤氣入觜中兵起波揚
寶燒出觜兵隨之 黃白氣潤澤入觜中有神寶入天子有喜
出觜天子亦喜

雲氣犯參七

都萌曰蒼若白氣入伐大將有憂斬刈事出伐以白衣斬伐
蒼白氣入參臣為亂若出參體環繞參天子起邊城 蒼白氣
入參波揚邊城燒一日倉廩大失火 黑氣入參中正銳大人
憂 黑氣出參無兵有水之憂一日將死亡出伐以水斬伐之

變

靈准聽曰白氣揚陽參御馬

注曰禹有勤勞天子其賞賜以玄珪告厥成功又有明氣如馬見于

命為揚陽者明也參者金德禹之王也宋書天文志

曰昔孝懷永嘉三年十二月乙亥有白氣如帶出東南北方各
二起地至天貫參伐占曰其下大兵起四年三月司馬越收繆
肩繆播等又三方雲擾攻戰不休五年二月司馬越死於寧平
城石勒攻破其眾死者十餘萬人六月京都營滅帝劫虜廷
都萌曰赤氣入參有內兵大將為亂戮死 赤氣出參中央邊

城有兵縣令自將 赤氣入伐大將有憂斬刈事 黃氣出參
伐有兵一日以水為斬伐 黃白氣潤澤入參中大將受賜氣
出伐將戰大勝 黑氣出參伐有兵

雲氣犯南方七宿

雲氣犯東井一

石氏曰青氣出東井大如井口上拂參東行入東井中有大水
沒高近期二十日遠三十日 都萌曰蒼氣出東井有水潦之
之令 蒼氣入東井萬民疫 黑氣入東井民多喪一日天下
大水道無行車民多喪 白氣入東井有水潦之令 赤氣出
入東井有水潦之令 赤氣出東井客來泉利者一日逆兵起
都萌曰赤氣出東井天子以水行兵 黃氣出東井天子以
澤泉養民一日饗民 黃白氣潤澤入井中客來言池澤水事

之兆

雲氣犯輿鬼二

郝萌曰黑氣入輿鬼大人憂之 白氣入輿鬼有疾憂

雲氣犯柳三

郝萌曰黑氣入柳水腐敗出柳其禍除 黑氣銳劍鋒正刺中
柳星三夜不去大人憂 白氣出柳有憂起宮室 白氣入柳
波者木有失火之憂出柳波者大旱 黃氣四出注期五十日
赦 黃白氣入柳有神木入者出柳中天子以喜出木起宮室
殿宇

雲氣犯七星四

郝萌曰蒼白氣入七星如飛鳥其喙正中七星大人憂 蒼白
氣出七星天子用急使氣見四曲不正者有亡臣 赤氣入七

星中兵起也若客來者有兵隨之氣波者大也 黃白氣潤澤

入七星有客來入者若出之天子使使賜諸侯王 黃白氣出七

星氣見而大風者赦 黃氣彷彿入七星有來貢獻者

雲氣犯張五

郝萌曰蒼白氣入張廷中賜客有憂出張禍除 黑氣入張轉

繞環之及刺之大人憂 黑氣入張氣回而散廷中有水憂

赤氣入張氣波廷中有火憂

赤氣入張若出天子用兵賜客 黃白氣潤澤入張天子有喜

賜客 黃白氣出張天子使行賜諸侯

雲氣犯翼六

郝萌曰黑氣入翼正抵星三夜不去星不見大人憂 赤氣入
翼有暴兵出翼用兵隨之 黃白氣潤澤入翼四海有侯王來

獻者天子有喜出翼天子使賜四海之國

雲氣犯軫七

郁萌曰蒼白氣入軫王不可行幸宮觀出軫其禍除 文曜鉤

曰有蒼雲白霓圍軫亡國之戒也 郁萌曰黑氣如鼠入軫正

中軫星大人有墮車之憂 黑氣入軫回散大水車不用出軫

其禍除 赤氣入軫氣波者車庫有火之憂 赤氣入軫兵內

起出軫兵出將行 黃白氣潤澤入軫天子有喜又曰諸侯有

獻車者氣出軫天子用車為幣賜諸侯王

大唐開元占經卷第九十五

大唐開元占經卷第九十六

雲氣犯石氏甘氏中外官占

雲氣犯石氏中官占一

雲氣犯梗河一

陳卓曰赤氣出矛星兵大戰梗河也 蒼白氣出起矛星正中之

將死

雲氣犯招搖二

荆州占曰蒼白氣出走矛星正中之將死一曰相死三夜不去大

人憂出天子其禍除也 招搖 荆州曰赤氣出走矛星正中之兵

內起大將為亂 赤氣出天子大戰 黃白氣出矛星正中之有

軍兵罷無軍天子有獻兵者 黃白氣出天子天子以喜出兵

吉

雲氣犯女牀三

荆州曰青氣出女牀後宮有病 黃氣後宮有子喜 白氣後宮有喪 黑氣後宮有死者

雲氣犯天棊四

荆州曰蒼白氣入天棊有喪出天棊其禍除 赤氣入天棊兵起大將戮死一日起天棊兵起 黑氣入天棊大人憂 郝萌曰黃氣入天棊先軀有拜賜者出天棊有拜出者

雲氣犯貫索五

荆州曰蒼白氣入貫索中天子憂亡地出貫索其禍除 赤氣入貫索中內兵起出貫索有兵出 黃白氣入貫索中天子有喜又曰諸侯有以地賂天子者出貫索者天子以地賂諸侯 黑氣入貫索中大人惡之

雲氣犯織女六

郝萌曰蒼白氣入織女女子憂疾出織女其禍除 赤氣入織女天子攻一家斬之出織女女子多外兵死 黃白氣入織女天子以女幸一家出織女天子外出得美女 黑氣入織女王者為女子所害

雲氣犯天市七

郝萌曰蒼白氣入天市中嗇夫遇賊一曰多疾 蒼黑氣入天市萬物貴出天市万物賤 赤氣入天市中斧鉞用波者市有大憂 赤氣出天市中兵弩貴 白氣銳端出天市兵出 黃白氣入天市中万物貴 黃白氣長如一疋繒常集天市中 有神奇物入天子有喜出天市中有奇物出者 黑氣入天市市壞若嗇夫死

雲氣犯天江八

郝萌曰赤氣出天江兵大起車騎滿野 黃白氣出天江天子用事起兵入江星兵罷

雲氣犯河鼓九

郝萌曰蒼白氣入河鼓中將有憂出河鼓其禍除 赤氣入河鼓中兵起出河鼓戰大勝 黃白氣入天鼓中將有降者天子喜出河鼓將壽 黑氣入河鼓中將死

雲氣犯匏瓜十

郝萌曰蒼白氣入匏瓜中果不可御也出匏瓜其禍除 赤直入匏瓜中天子攻一邑族 黃白氣入匏瓜中天子一邑出出匏瓜天子以果賜諸侯 黑氣入匏瓜天子食果為害

雲氣入天津十一

郝萌曰蒼白氣入天津中有水之憂出天津中其禍除 赤氣入天津中大旱出天津兵草起 黃白氣出天津中天子有德令 黑氣入天津中大水 京房曰漢中有黑氣獨居大如皮席名曰雲漢日雨至遲不滿三日五日必雨 又河有黑氣狀似舡若一疋布維河津間不出十日大雨

雲氣犯王良十二

郝萌曰蒼白入王良中奉車憂墮車出王良其禍除 赤氣入王良奉車有鉄鑽之誅中駟馬內亂兵起出騎蓋野 黃氣入王良中奉車拜賜天子有喜諸侯王有獻馬者 一曰有神馬見出王良奉車行德令出駟馬賜諸侯王又曰黑入王良中奉車死

雲氣犯附路十三

九唐開元...卷之六十一
三
郝萌曰蒼白氣入附路中大僕有憂出附路其禍除
赤氣入附路中大僕有鈇鑕之誅出附路中兵起 黃白氣入
附路中大僕拜賜出附路有德令 黑氣入附路中大僕死君
憂

雲氣犯天舡十四

郝萌曰雲氣在天舡中不出一年天下有自立者
蒼白氣入天舡中有殃出天舡其禍除 蒼白赤黑氣入天舡
天子有憂出舡不可御也 赤氣出天舡有兵用舡行 黃白
氣入天舡中天子幸舡有喜必有神狀若光景處舡上者亦主
慶賀

雲氣犯南北河十五

郝萌曰蒼白氣河戒期兵大起道不通出河戒間其禍除 赤

氣出河戒天子用兵向諸侯 黃白氣入河戒間隨河行有德
令逆河行有客來和親者

雲氣犯太微十六

帝覽嬉曰太微中雲如鳥諸侯來謀天子有中人為應者

荆州曰有青氣起五帝經出南門者不出九十日人君失其宮

天下大不安 黃帝曰青白黑氣入左右掖門天子憂喪事出

太微其禍除 荆州曰赤氣入太微中其起出太微中有立王

黃帝曰赤氣入東西掖門內亂兵起 荆州曰赤氣出東西

掖門兵起將受令 赤氣如劍直指太微天子有兵驚 赤黃

氣潤澤入太微天子有劍喜 石氏曰赤黃氣潤澤狀如帚入

太微婦人有喜 荆州曰赤黃氣出太微天子用錢賜諸侯王

氣狀如帚者天子用錢賜美女狀杯椀正圓者天子用璧玉賜

諸侯王 甘氏曰太微天庭中有氣如井色旁白中赤近臣欲
逆也 郝萌曰黃白氣出太微有立王 黃白雲氣起太微宮
上有光人主大喜延年益壽 黃白氣出左右掖門天子出德
令 黃白氣狀如杯椀正員入太微天子有璧玉喜又曰幸臣
有獻美女者 黃白氣狀如獸入太微天子用畜賜諸侯王
赤黑若白氣狀如虹及龍形在太微天庭上有白衣之會其周
章環太微天庭而入之臣殺主 黑氣入左右掖門大人憂之
內亂

雲氣犯黃帝座十七

荆州曰蒼白氣抵座星天子有喪事抵座旁臣有反者 青赤
氣出五帝座近臣欲謀其主氣明大者天下大亂不明者事不
成 赤氣直指座星兵起內亂 郝萌曰赤氣狀如帚直指座

星天子有婦女兵驚 荆州曰赤氣狀如劍直指座星天子有

諸侯兵驚 黃氣出太子座上入五帝座者不出六日太子即

位 郝萌曰黃白氣如杯椀正圓抵座星左右諸臣有喜

黃白氣潤澤如刀劍抵座星天子有男喜 黑氣抵座星留止

不去大人憂 荆州曰黑氣抵座左右諸臣死

雲氣犯即位十八

荆州曰蒼白氣入即位中即有內亂者出即位其禍除 赤氣
入即位中兵起出即位多用兵遠出者 黃白氣潤澤入即位
中即受賜 黑氣入即位中即多罪死

雲氣犯三台十九

孝經右祕曰三台珥主欺吏大臣變姓以為忠 三台珥臣謀
弒^注不出三月必有矣 荆州曰蒼白氣入三台人民多憂喪

赤氣入三台多敗傷出三台其禍除 黃白氣潤澤入三台
安和無兵天子有子孫之喜 黃帝曰有蓬雲其色黃白方不
過三尺見於三能之陽布衣貴

雲氣犯天牢二十

荆州曰有氣大圍長三尺四尺出天牢中貴人及親屬必有斬
死者天下不安五穀貴

雲氣犯文昌二十一

郝萌曰黑氣入司命中司祿中嬰兒多死

雲氣犯北斗二十二

元命包曰虹蜺守斗主泣血后奔逃強國起 右秘曰天子不

明雲覆斗

郝萌曰北斗有赤氣覆之兵大起氣多者兵大少

者兵少

荆州曰氣五采直入北斗天子立太子 京房曰北

斗旁有黑氣狀禽獸大如皮席不出三日必雨不雨有虜入塞

荆州曰赤氣入北斗中還向南斗不過一年下有流血兵將

死者勝主人

郝萌曰黑氣入北斗如群鳥龍蛇變化為疾病

人民亡不宜乳婦夷兵咸欲欺中國宜伺候諛言為要 荆州

曰白氣如車入北斗轉移者下有流血大將死

郝萌曰黃雲蔽北斗明日雨 赤雲掩北斗明日大熱殺人

白雲壓北斗不過斗三日雨 青雲壓北斗立雨天下皆无雲

暗北斗上下獨有雲後五日內必有大雨 荆州曰有青雲

歷七神從行則天子出令違四時橫行則出善令順四時

黃雲氣歷七神從行則君民皆有喜橫行則天子獨有喜

黑氣雲歷七神從行則天子有憂橫行則人民有憂七神北斗

七星也 命歷序曰斗出白黃安昌白黃瑞名也赤是黃白氣

橫在斗 司馬天文志曰白氣衝北斗為大戰 續漢書天文志曰嘉平二年八月辛未白氣如一疋練衝北斗第四星為大戰 荊州曰有青赤雲氣加正星處軍有衝水不然將軍死若列土有移國更名者 又曰有青赤雲氣加正星期一月有兵三歲若五歲而罷 又曰有黃氣加正星有兵不發若有土功期一歲至三歲

黃帝曰有白雲氣加正星三日不雨有大兵若白衣之會一曰有土功期三月若七月 又曰白雲氣加正星有軍則戰無軍則疾 黑雲氣加正星有軍而不戰 郝萌曰氣加法星之上天下變更將相死不死有赦若糴貴期三月 荊州曰有青雲如氣加法星大水若兵劍馬牛皆大損 又曰有赤雲氣加入法星有兵期一年二年而罷 有黃雲氣加法星八日君疾

郝萌曰有黃白雲氣加法星逆令若有土功犬暴貴 黑氣出法星間不出一年有赦不出三年有大水 黃氣加令星有死將其丹至及三至有軍相對 荊州曰有白雲氣加令星多更法糴貴粟菽麻鹽五倍 郝萌曰青雲氣在伐星下有兵若有憂期五月 荊州曰青雲氣長竟天其末有星加伐星天下有大水若有名獄 又曰伐星色赤有青白雲氣加之有兵期三月四月若一歲 郝萌曰伐星黃有黑氣在其下有兵事有雲氣加殺星相反若貴人疾八日鹽馬牛貴綺繒賤期百二十日 荊州曰殺星色黑有赤雲氣加之有兵憂 白雲氣蓋於殺星有兵期三十日若一歲 黑雲氣加殺星有暴兵半歲罷 有雲氣加危星色青憂黃有土功事黑有大憂 有氣出應星中有移民色赤有兵黃增地

有氣集輔星相有斧鑕之誅 郝萌曰有潤白氣集輔星相有喜 荆州曰慘白氣入輔星相有憂 蒼黑氣入斗魁中貴臣死獄中者出北斗魁中其禍除 赤氣入北斗魁中將相有斧鑕者 黃氣出北斗魁中天子出德令 郝萌曰赤氣入北斗魁中兵起出則兵出 荆州曰黃白氣入北斗魁中天子左右幸臣有囚者蒙德令 郝萌曰白氣入北斗魁中幸臣有繫者無故出魁其禍除

雲氣犯紫微宮二十三

郝萌曰客星氣入紫微宮中天下亂一曰列大夫多死若人主有憂 荆州曰有雲氣狀如雞雉紫宮中此子孫之氣也 石氏曰赤氣出紫宮兵大起 荆州曰赤氣出紫宮中兵起有立王 赤黃潤澤入紫宮天子有劍喜出紫宮中天子用金錢

賜諸侯王 赤氣如帚出紫宮中天子用金錢賜美人 黃白氣潤澤如刀劍入紫宮天子有男喜狀如帚有婦女喜 郝萌曰黃白氣如獸入紫宮天子用畜賜諸侯王 荆州曰黃白氣出紫宮中立王 黃白氣如杯椀正員入紫宮天子有璧玉喜若幸臣有獻美女者又曰有立侯 郝萌曰有黃白氣如旗有光起宮上人主有大喜延年益壽 司馬彪曰白氣出紫宮有喪 續漢書天文志曰孝和元永十六年四月丁未紫宮生白氣如粉絮白氣生紫宮中為喪後和帝崩 郝萌曰黃白類如走獸飛鳥入紫宮者客喜 蒼白氣出紫宮其禍除氣或入長垣胡人起

雲氣犯北極二十四

荆州曰蒼白氣入天樞中天子憂疾出天樞其禍除
赤氣出天中兵起車騎橫滿野 郝萌曰黃白氣入天樞中天
下兵大起出樞天子賜諸侯王 荆州曰黑氣入天樞中大人
憂

雲氣犯鈞陳二十五

白氣入鈞陳中大司馬憂喪出鈞陳軍破將憂 赤氣入鈞陳
中內亂大司馬戮死出鈞陳大戰將有功 黃白氣入鈞陳中
天子立大司馬出鈞陳不戰兵在外者罷 黑氣入鈞陳中大
司馬溺軍出鈞陳其禍除

雲氣犯石氏外官二

雲氣犯魚星一

郝萌曰赤氣出魚星兵大起車騎滿野 黃氣出魚星天子用

事起兵入魚星兵罷

雲氣犯天倉二

郝萌曰蒼白氣入天倉歲不熟出天倉其禍除 赤氣入天倉
兵內起氣波者大旱火大起出天倉粟以兵出 黃白氣入天
倉中歲大熟

雲氣犯羽林軍三

郝萌曰蒼白氣入羽林之南后有憂入其北諸侯有憂出羽林
軍其禍除 赤氣出羽林東后起兵入其西太子起兵入其北
諸侯起兵出羽林兵隨之 黃白氣出羽林南后有所獻出其
北太子有所獻 黑氣入羽林南天子惡之入其西太子忌之
入其北諸侯慎之

雲氣犯天廩四

大唐開元九年

卷之六

九

大唐開元占經卷之六
九

郝萌曰蒼白氣入天廩中有大虫出天廩其禍除
赤氣入天廩中大旱出天廩天子用兵出粟 黃白氣入天廩
中歲多粟出天廩中天子出粟饗民 黑氣入天廩中水殺人
民飢

雲氣犯天苑五

郝萌曰蒼白氣入天苑中牛馬野禽獸多病出天苑其禍除
赤氣入天苑中牛馬多傷出天苑牛馬以兵起出者 黃白氣
入天苑中牛馬野禽獸蕃息出天苑牛馬多以令出者 黑氣
入天苑中牛馬多死出天苑其禍除

雲氣犯天弓六

郝萌曰青氣出入天弓不出一年西胡來欲盜中國若侵地不
出三年天下煩擾

雲氣犯厠星七

郝萌曰蒼白氣入天厠中天子有陰病出天厠其禍除

漢書天文志曰哀帝建平元年有白氣從地至天出參下貫天
厠廣如一疋布長十餘丈哀帝陰病候 郝萌曰赤氣入天厠
中內兵起出天厠其禍除 黃白氣入天厠中天子有喜有奇
物見者出天厠中亦喜慶 黑氣入天厠中大人憂出天厠禍
除

雲氣犯玉井八

郝萌曰青氣從參下入玉井中不出三年不飲食其井

雲氣犯甘氏中官三

雲氣犯紫宮內座一

荆州曰黃白氣狀如杯椀正負入紫宮座左右諸臣有璧玉喜

至

雲氣犯五帝內座二

荊州曰有赤青氣出五帝下幸臣中不出六十日近臣謀君氣不明者不成明大者天下大亂

雲氣犯天潢三

郝萌曰蒼白黑氣入五潢中有死喪憂出五潢其禍除 赤氣入五潢中兵內起氣波者兵庫燒出五潢兵出戰 黃氣入若出五潢中天子有喜安和無兵有兵亦罷

雲氣犯咸池四

郝萌曰蒼白氣入咸池中魚多飛亡出咸池其禍除 赤氣出咸池中旱 黃白氣入咸池中天子有喜出咸池有神魚見 黑氣入咸池中大水出出咸池其禍除

雲氣犯甘氏外官四

雲氣犯折威一

郝萌曰蒼白氣入折威中大臣為亂兵起天子失威出折威其禍除 赤氣入折威中大臣為亂天子出兵 黃白氣入折威中有來和親者天子有喜出折威天子有德令 黑氣入折威天子惡之出折威禍除

雲氣犯芻藁二

郝萌曰赤氣入天積中有火之憂出天積中天子用大出散貨 黃白氣入天積中天子自喜多出貨財出天積中天子用喜出貨財

大唐開元占經卷第九十六



